

## 'L calēnder y 'l Ladinèr-Verein.

Zēn ie-l 'l tērzo jēde, che 'l calēnder vēn dat ōra. Ciuldí da-sēis-a ōra 'n calēnder per gherdēina? damanda šaldi. O, farēis-a bēn de bon afari limpōa, 'l ie 'mpò bēn-de-bò ciēr, diš-i pò mò. O d'autri diš inò, che fašóns per i cuntè 'n valguna filastòches a chēi de Gherdēina.

'L vadagni se fašóns danz mè da cumedón ite; y cula fila-stòches! pu chēles mussóns mèter ite; še no n'el cumprēssa deguni.

D'autri n'ie-l che se-la riš, can ch'i vēiga 'n tēl calēnder, i cujenēssa giēn. Pazienza! Gēnt che cujona giēn ie-l dagnēura stat y sarà-l for. N'ie-pa al incontra 'nce šaldi, che sà cie che 'l calēnder uel y che vēiga giēn, che 'l vēn dat ōra.

'L calēnder uel dant al dut ve fē mantēnì nōš linguagio. Bōle dan 50 aņi ie-l sta 'n profēsser ch'à dīt y scrit che nōsta rusnēda mòr tòš ōra. La ie mò for y resterà mò giut, mè-drē che nēus Ladinš ulōns. Ma ulēi messóns. N'ie 'nce de chēi che se dēuda a rusnē ladin, sibe fedóm o fašán, badiòt o gherdēina. Š'i se dēuda dela lingua ch'i à 'mparà da si oma, nressēss-i bēn 'nce se daudē de si oma! Y de tēi fos bēn de stlōt fións! I miena de vōster plu da segnēur, š'i rešona tudēsc. Y cie tudēsc! danz puec da segnēur! Justa chēi che sà bēn tudēsc y mò d'otra lingues, tēn cont del linguagio ladin y 'l rešona giēn. Y chi che uel vōster 'n drē' Ladin, che uel desmustrè che 'l à patriotismo, dēssa fē dò chēš ešēmpio y no se daudē de si linguagio.

Mò plu! J mutóns dēssa y muēssa 'mparè te scōla per ladin. N' outra lingua ne 'ntēnd-i nia, can ch'i scumēncia a gi a scōla. Cò che la ie al dí da 'ncuei te vèl scōles, pò-ŋ dì, ch'i 'mpèra a lieġer per tudēsc y ne 'ntēnt nia cie ch'i lieč. Drē' tan 'mpèra a lieġer chinōš o arabiš. Y ie-l-pa da se fē marueia pò, š'i lieč mèl, a ne savēi nia, cie ch'i lieč? Per chēl vēgn-el dat ōra na bíbia per gherdēina zēn. Iló pò-i lieġer ch'i 'ntēnt dut, pò lieġ-i 'nce cun plu ueia y 'mpèra a lieġer drēt. Y pò 'mpèr-i 'nce plu saurí a lieġer vèl d' auter.

Ciuldí-pa 'mparè gherdēina, dirēis. Cula lingua se muda 'nce 'l carater dela gēnt, se muda duta la maniera de viver de 'n pòpul. Y nēus de Gherdēina n' on deguna gauša de mudè. Nōš pèrēš y nēineš à for cuntenì la rusnēda de Gherdēina, y nēus pudón 'ncuei avēi supèrbia a vōster de Gherdēina. Ulá ie-l-pa 'n tēl

pitl pòpul te na valèda zënza de gran zitèjes, che sibe revà tan inánt, ch'èbe tan de bōla manieres che te Gherdēina, che s'en stèbe tan bèn? Y la gauša ie, che i vōdli de Gherdēina fōva de vōri Gherdēines, no mōz tudēsc y mōz Gherdēina, šiche chēi de Gherdēina, che uel zën vōster tudēš. Nōsta lingua ie 'n gran vantagio. Nēus 'mparón talián, franzēus, spagnòl y 'nce latín mò 'n tan saurí che 'n tudēsc; y 'nce tudēš 'mparóns plu saurí y mieč che 'n Talián. Tanč de Gherdēina n-ie-l-pa t' Italia, te Franzia, te Spagna, y dlonc tela gran zitèjes ch'i vif da segnēures! y tanč n-ie-l-pa da Ciaslōl o da Lajón!? deguni pò-η dī. Y še nēus de Gherdēina diventessàn tudēš, ne 'mparessàn ēnche no plu tan saurí i autri linguagi y n'en pudēss-el plu gi tanč de-mōz a fè afari.

Chēsta ie la 'ntenzió del calēder: de ve fè tení cont de nōsta lingua, de ve-la 'nsegnē inò! šì, 'nsegnē, che n-ie šaldi che ne 'ntēnt nia plu paròles, che nōš pèrēš adurvōva pò-vōster ugni dí. Y aciò che 'mparēis inò chesta vōdla paròles, à dat ite bēra Franzl da Lenèrt doi stōries cun 'n grum de tēl vōdla paròles.

Ma no mè 'l calēder se prōva zën da 'n trēi añi 'nca de cialē de nōsta lingua y de nōsta pitla nazió. Zōche 'n tòc plu de 'mpurtanza ie-l diventà chest añ. Ladíns, ch'ie a Dispruc, s'à metù adúm y à fat 'l

### Ladiner-Verein.

'L Ladiner-Verein uel dant al dut tení adúm i Ladíns del Tirol, aciò ch'i ne vēgne zapèi sot danter Tudēš y Taliani. 'L uel purvè de cunservè la lingua ladina y dà-pa òra libri o plu tèrt fòli ladíns. Ma 'l «Verein» pò mè laurè cun fōrza y che'l pòrte frut, še 'l n-ie šaldi le-prò, še duč tegnón adúm y laurón cul Ladiner-Verein. Y no mè cul pajē ite ugni añ chēl che 'l ie da pajē, dassóns tení pōa; messón 'nce laurè. 'L ie tan de tēl vōdla stōries, che savēis vo de Gherdēina y vo autri Ladíns: scrišē-les su y mandē-les al Ladiner-Verein, o cuntē-les a valguni che sà da les scri su. Eis tēl vōdla scritures, che ne savēis plu cie fè limpōa; mustre-les a un che se 'ntēnt òra, pò-vōster che 'l sibe vèl de 'mpurtanza per la stōria di tēmpes passēi. Y duč i Ladíns, Badiòč y Gherdēina, Fedomes y Fašáns messóns tení adúm y laurè de-berieda. Tel calēder da chest añ ie-l 'nce 'n articul fedóm, che trata de Catarina Lanz. Y cul tēmp messóns pudēi dē òra libri o zaites, ulà che duta cater valèdes ie la-ite.

Ma, dirà i Badiòč, ce m'en va-pa a mí i Fašani o Fedómes o chēi de Gherdēina?

Duč messón tenì adúm, son danter i Tuděš y Taliani ite, y še ne tegnón adúm, saróns tòš finèi.

I Taliani mášima cuntēn for a dì, che nēus son Taliani; ma nes mancia mè la bōla grazia dela cultura taliana, diš-i!

Che ne son Taliani, sà 'ncuei cun dí ugnún, ch' à studià 'm pue' de vèlc, o ch'ie mèi stat te val de Gherdēina o te n'autra valēda ladina. I Taliani 'nstěš, ch'a 'm pue' de cundiziún, cò che la gēnt o la rusnēda ladina ie, y che ne uel mentì, diš, che ne son Taliani. 'L ie mè tèi Taliani, che uel mēter dut sot-sēura, che uel nes fē Taliani. 'Nfina-mēi òra de bèra Franzl da Lenèrt à-i fat 'n Talián te na zaitun. Ma plu da rì ie-l mò, ch'i ulěssa nes fē avēi la grazia dela «cultura taliana». I nes en manda bēn for òra 'm puecia al jēde: ēiles cun 'n tlap de mutóns, che sta ca šiche la pives de 'n òrgun, dut zarèi y da ledám, vēn a petlè 'mpò de stē te ch'la »bōla Italia«; ēi, che se bōf via la sada sēira bōle, cie ch'i s'ā davagnā via per l'ōna, y che va da na ustaria al' altra svajān y riei cun gēnt; d' autri che vēn a rubè o gor mazè gēnt, šiche ta Rustlèa!

A udēi tēl gēnt mussěss-uŋ danz i giatē ueia a ch'la bōla »cultura taliana«. N'ēis drē d' avēi tēma, vo Tuděš te Gherdēina y vo de Gherdēina, che ulěis vōster Tuděš, che nōsta valēda devēte taliana.

Ma vèl d'auter ie la lingua taliana. Per chēl ch'un 'mpèra talián, n' ie-l mò Talián. — Y la lingua taliana pò-ŋ for adurvè. I Taliani, che studia, 'mpèra tuděsc, y pò giatē plaza te 'n luec talián y te 'n luec tuděsc, še bēn ch'i rešona mèl tuděsc. 'N Tuděsc, che sà mè tuděsc, pò mè zapè ite te 'n pòst tuděsc, ēl à mè 'l Tirol tuděsc per ēl, 'l Talian al incontra dut 'l Tirol. Y a vōster, che nēus de Gherdēina 'mparón tan saurì talián, fōss-ēl da mat, a n' ulēi 'l emparè. Bèra Franzl Moroder à rešon, še 'l diš ch'i mutóns dēssa 'mparè bōle te scōla 'nce talian, al mancul 'mparè a lieġer. Per chēl ne devēnt-i segur no Taliani; justa nēus Ladíns s'on cuntēni mieč y on žarà òra mieč i Taliani che i Tuděš, cialēde mè tan insú ch' i ie bōle revēi sot-a Bulžán.

Ma per chēl che n'ulón devēntē Taliani, messóns-a devēntē Tuděš? No. Mò n'jēde recurdē-ve che nōš antenatì ie stai Ladíns y ch'i à 'mpò na miēur cultura, che ne l'ēbe i Tuděš ch'udón 'ntēur ite: a Ciaslōl, a Lajón, te Pustaria. Y 'l ie burt y na ingratitudine, š'i Tuděš, ch'ie te nōsta val, uel cujenè y dì ġu de chēi de Gherdēina y de la val de Gherdēina. Še la n'i scusa, pò-i pu s'en ġi; š'i sà massa stlōt a viver via de chēi de Gherdēina, vède a se cri da lēur 'nvalgón d'auter.

Nēus de Gherdēina, nēus Ladíns restón Ladíns. I mutóns 'mpère 'l linguaggio ladín dant al dut, i 'mpère talián, pò-vōster ch'i 'l adròve 'n dí o l' auter; i 'mpère 'nce tuděsc, ma tēgne dai

Ladíns, rōste Ladíns y lēure can che 'l ie cul Ladiner-Verein: duč adúm, pò laša ch'i Taliani svěje y mēnte, laša ch'i Tuděš kujone; cujeně ie plu saurí che fě mieč.

'L Ladiner-Verein nen ie mè a Dispruc. 'L fěš 'nce grupēs t'ugni valēda; 'nce te Gherděina dēss-el diventē una o de plu grupēs. Šaldi de Gherděina n-ie-l bōle le-prò. Chi che uel zapē ite, scriše al Ladiner-Verein a Dispruc o i pò 'nce s'anunziē pra Engel Riffeser da Dēur a Sta. Crestina o Cristl Delago de Tuene a Urtišēi. N' auter añ šiche zēn pudóns avēi trēi bōla grupēs te Gherděina y nen on plu drē de scri a Dispruc.

A. L.



## L' añ dal' èghes 1882.

'L en vif bèn mò assè, che se recòrda di spavēnč che fòva stai l' añ 1882. Ma per 'l plu sà ugnùn mè da cuntè 'm pue' de zòche: chēl che 'l à udù. Per via de chēl rat-i che 'l paje la fadia a mèter ite tlo per gherdēina, cie che anda Madalena Linder da Fušerón à scrit mò 'n chēl añ o tel prim mēns del añ 1883; l' à scrit per talián, ma la à udù o al mancùl audì cuntàn prēs dō chēl che fòva suzedù y per chēl pudóns i crēier, cie che la scriš. Audide:

«Chest inviērn ie-l stat puecia nēif, frēit negún, 'l n'ie adōs mèi stat 'nši. I primes dīs del añ ie-l diventà na desgrazia: s' à apicà Ušöp Moroder de Ronc. R. I. P.

De Curēisma ie-l stat malaties de tēi pitli, che 'n muriva doi, trēi, 'nce cater t' una cēsa, y te de plu cēses n-ie-l mòrt 'nce doi t' un dí.

I mēns de Mèi y de Ġuni fòv-el frēit y 'l à fat plu jēdeš la nēif y à ruinà la siēla a Sa. Crestina y a Urtišēi mò plu ch' a Sa. Maria. ....

'L mēns d' Agóst fòv-el sa mont da vēnt, nēif y frēit; fēn a-i fa puec defin. Chi ch' à pedù seġlè l' òrde chēs mēns, 'l à fat bōl y bon, ma chēi che nen à pedù 'l seġlè, à messù 'l lašè cater o cin ònes sot-al tēmp.

Ai dodeš ie ġita Catarina Ploner da Marisán ġa mulín da Pascuèl y ie sautēda te ruf; la ie revēda fin òra 'n Grēva; la fòva òra de cervöl. R. I. P.

Ai 14 à-l scumencià a pluvēi, che i ruves chersòva y che chēl che fòva pra ruf, tumòva dut te ruf: leniám, saš y tiēra. Ai 15, la gran Sa. Maria, ies-i unii 'ntan la perdica a priē che ġēnt vède òra mulín da Còi-a trapinè y pò prēs dō ie tumà ite la cēsa tel' èga, cun doi persones dedite: 'l patròn de cēsa y Ġiuvani da Ulēta. Chēs ġiva dō l'èga òra cui braces spanèi, ma deguni ne pudòva y ġudè, šaldi ġēnt bradlòva dal spavēnt; 'l ie ruà 'nfin òra 'n plan de St. Antòne. Just ala medōma ėura à ulù Nazio de Plan dala Sia passè 'l puent da mulín da Pascuèl; can che 'l fòva t-a mōz, ie tumà ġu dut 'l puent te ruf, y ēl ġiva dō l'èga òra danter lēns y saš, da un gonf al auter, che 'l fòva 'n spavēnt a 'l udēi; y i òva cherdà 'n pròve y iló sul ėur de ruf à-l ricevù 'l sant uele, y pò 'l à-i purtà via 'n tublá tel fēn, iló s' à-l pistà y doi ėura dō ie-l mòrt; duč diš che 'l ie sta 'n miracul.

'N chel dí n-ie-l restà šaldi zēnza mēssa, ch' i mussòva trapinè, . . . , pervia che i ruves chersòva for plu y plu, de maniera che te trēi o cater ėura ie-l tumà tel' èga mulíns, síes, cēses, y puenč de granč y de pitli; mè doi o trēi n' ie-l mò restà te duta la val. Chēi che fòva delà dal' èga, mussòva stē la-via, y chēi che fòva decà, mussòva stē decà.

Chèi de Custacia, che nen ie gîc prēs a cēsa dō mēssa, à messù gî su per Ciandevaves per revē a cēsa. La prima Dumēnja dō nen à deguni pedù gî a mēssa, i ie duč gîc tela capōla de Puciacia.

Passón al luncē, ch' ie sta mò pieč. Dala cinc da dumán aud-u-ŋ sunán ciampāna a martōl, che 'ŋ dē sautē 'n aiút a chēi da Dōsses, percie che 'n tublā ie tumà tel' èga y l' auter fōva te gran pericul. 'L bestiám à-i mandà sun vila da Imán. 'Nce la cēsa de Levīs de Pigón fōva 'n gran pericul; 'l stradón y 'n tòc de ciamp à l' èga giavà òra, ma 'l puent sta fērm. 'L fōva gēnt iló cun rangiers y autra massaria, ch' òva tēma, cha l' èga se tulēs dut, pervia che la menòva lēns y saš. L' à fat 'n gran dañ ala campanjes.

Gon via Ruacia. 'L ie unì da la-sú gū 'n tòc de mont y lēns te ruf. te 'n mumēnt à-l ruinà dut 'l pra y la campanja; 'l fōva gran pericul, che la cēsa gissa 'n revina. A Bastel à tēut l' èga 'l mulín, la turnadēcia, 'l pra y 'n ciamp 'ntiēr y del auter 'n tòc. A chiš doi patróns ie unì šazà 'l dañ sun passa mile raineš. . . .

Passón al maġer spavēnt de duč. 'L Luncē, ai 18 de SetēMBER, dala dieš dan-mež-di s' à destacà 'n tòc de crēp sēura Fussel ta Sa. Maria y ie unì gū na gran bōa y à menà de-mōz 'n tublā y 'n tubladōl y na cēsa dut sot-sēura; y dedite fōv-el sies persones. O, cie spavēnt, mèi udù te nōsta val; šaldi à udù chesta desgrazia, pervia che la gran fuera fašōva cialē via duč y duč bradlōva y svājōva. I ugíns se purtōva 'l fantòrum òra dela cēses, davia ch' i fōva 'n gran pericul d' unì mò sot-ala bōa, 'l passōva 'n gran ruf, de nuet ne se 'nfidōv-i nia plu a stē.

La rusnēda y 'l spavēnt fōva tan grant te duta la val, che la strēdes fōva plēines de gēnt che cialōva al' èghes. 70 families à messù trapinē te chēsta curazia. . . . .

Tra chiš sies defonē da Fussel fōv-el doi patrones: anda Catarina de 71 aņi y si fi Paul de 32 aņi, si fia Catarina de 28 aņi; si uem Paul s' en ie mò mucia per miracul, še bēn che 'l fōva tela bōa, ēl ne sà 'nstēs no, cò che 'l à fat; l' autra patrona ie Felizita de 51 aņi y si fia Mariana de 21 aņi y si fi Zenz de 16 aņi. La prima à-i giatà Mariana, pervia che la ne fōva nia te cēsa; la fōva gita cula fanciōla a giavē patáč; še duta dōves fossa states chietes, ulà che les fōva, foss-eles states segures; ma Mariana ie mucēda dal' autra pēt y ie revēda tela bōa; la gēnt la udōva uniàn gū danter la bōa ite; 'l fōva na gēuna bōla de cōrp y 'nce bōna de spirito.

Tēmp d'òto dí à-ŋ giatà 5 persones, ma Felizita nen à-i nia giatà, še bēn che 'l ie gīt sies ònes la dumēnjes šaldi gēnt a la cri, ma 'l ie stat dut per nia, 'nši à-la messù stē dut 'l inviērn sot-a 'n grum de tiēra. . . .<sup>1)</sup> Zenz, Paul y Catarina fōva sfranč,

<sup>1)</sup> La nen ie mèi plu unida giatēda. . .

ch' i ne fòva plu da cunēšer; anda Catarina ne fòva tant; ěila fòva te cěsa-da-fuec, l' òva 'l mus da fulim. Mariana ne fòva te chěla bòa; la bòva s'òva despartì te doi ruves, y Mariana udòv-uŕ mò per na giama . . . R. Ī. P.

De chesta doi partides ie-l mò restà da una pèrt 'l père, doi mutóns y doi mutáns, y dal' altra 'l père y doi mutóns; chiš ne fòva nia a cěsa, i ie restěi zěnza cěsa y zěnza mobilies; dodes cě de bestiám fòva restěi . . . 'L Mèrdi dala sòt ie-l stat la supeltura de cater defónĉ: de chi trěi arneghěi y de Tone da Lampežán, che fòva mòrt cater dís dant, ma ch' i ne pudòva nia purtě sěura ruf ca; i à messù revě sa Dlaces y revě te Sělva a 'l suppli. . . . .

Chěi che fòva delà dal' ěga, ne pudòva nia passě ca. La ġěnt se menòva piciá, i primes-dís i traġòv-i via pan, y chěl che 'l giatòva, bussòva la man; y pò à-i scrit na lětra, l' à tachěda pra 'n sas y l' à trata via, a damandě š' i adròva vělc; y chěi la via à scri inò ca, pò à-i trat via 'n fiěrtràt y na còrda y l' à tachěda pra 'n lěn, y pò à-i cul fiěrtràt mandà via na spòrtula de ròba y inò trat ca la spòrtula, y 'nšì à-i fat te plu lueš.

Depò à i ruves inò metù man de calě y la ġěnt à scumencià a laurě, ma 'l dañ fòva dlonc tan grant, ch' i ne savòva ulà piě ite; i à purvà a mèter a ġi i ruves plu 'ndrět y à fa de pitli puenĉ da passě. Pò ies-i 'nce ġiĉ a cri 'l bestiám, che 'n fòva mò šaldi sun pastura, i à desmuntà y per revě a cěsa à-i messù ġi ta Dantterleghes a passě. La ġěnt à abù 'n gran dañ a cěsa y sa mont. Cie ch' i òva laurà pra i ruves, 'nfin zěn, ie dut sta fat per nia, che ai 28 d'Otober, 'n S. Šimón, à-l scumencià a pluvěi šiche 'l ciel fos daviěrt, dí y nuet, y dut ie inò ġit 'n revina. Y zěn manaciòv-el na desgrazia sa la pitla Rišěda, ala cěsa y ala campanja; 'l fòva gran pericul, ch' unissa ġu na bòa. La Duměnja ie ġiĉ su i pròveš cul Santišimo y duta la ġěnt, che fòva a dliěša, 'l acumpagnòva per priě Idie che 'l nes stravěrde da na těl desgrazia. I giandarmi ġiva per ch' la cěses a dì ch' i děssa s' en mucě, ch' i ne dě plu albergě, davia che 'l pericul věn for maġer y maġer; 8 families fòva te gran pericul. Zěn fòv-el inò la rusněda de chěš per duta la val, y šaldi univa a uděi; 'nce doi inġenieries de Bulžán ie unĉ a uděi, i s' à strěnt la šables y à dit, che te ch' la cěsa ne stašěs-i.

De gran saš šiche furniei univa ġu, ma i s' à duĉ fermà zěnza fě dañ. La cěsa de Cristl da Rišěda ie zessěda, che 'l ne pudòva plu stlu no i ušes no la pòrta; la ròba de valuta à-l trapinà òra. La campanja fòva šaldi ruiněda . . .

Zěn à-l scumencià a uni frěit, 'l à nevět, che dut s' à inò fermà. La ġěnt ie inò tela cěses, i lěura zěnza těma.

'Nfin zěn ě-i scrit dut mè de crěušes y desgrazies; y zěn ue-i 'nce scri věl-de bon. Nòš Kòser y grofs y baróns y d' autri gran

segnëures à dunà na gran soma a chiś puere desgraziēi, y 'nce d' altra bona gēnt de Dispruc, de Marán y d' autri lueś s' à tēut la bria y ie gīc cēsa per cēsa a petlè per chēi de Sēlva y de Sa. Crestina y à mandà 'n valguna casses de ròba d' ugni sòrt: quant d' ugni sòrt, blava y farina da i dè ai puereś. Y 'n uem de Marán ie gīt 'ncantēur a petlè y ie unì 'ntēs a partì òra i gròś al dō ch' i òva abù 'l dañ: chi giatōva 30 raineś, chi 35, chi 40 y 'nce 70. Rengraziōn y priōn per ēl, che 'l èbe benedeśiōn 'n chēsta vita y 'n l' altra.

Chest aņ n-ie-l mòrt 83, y de chiś 15 da mòrt 'mproviśa: 4 tel' èga y 6 ta Fussel; Tōne del Sòtler ie gīt dan-mež-dí sa Vastlè ala fin de na criatura y dō marēnda ie-l mòrt te 'n colp; bèra Batista da Calōnja ie gī da dumán a mēssa y ie revà a cēsa y ie tumà 'ntēur mòrt; Cristl da Bugón ie gī da sēira a durmì tel fēn y da dumán 'l a-η giatà mòrt; Clemēnza del Chetán ie gīta a Urtisēi y a unì ite ie-la revēda ta crist da Tieśa, y iló l' à-i giatēda mòrta. R. I. P.◀

## La festa fatta alla Plie da Fodom, cánche le ste descurì 'l monument a Cattarina Lanz, ai 23 de šugn 1912.

Na festa patriotica, compagna de cala dei 23 de šugn de cast an, i Fodomi no nà mei vedù e no ne mei ruè a dallerg tanč de foresti e tanč de bersaglieri, come n occasion che le ste descurì la statua della Catarina Lanz.

Cánche le ste la festa dei čant agn del 1909 a Innsbruck, per recordè le prodazze dei Tirolesi n te le viérre coi Francesi, n bel numer de Fodom eva sus fora, vestís da bersaglieri, per mostrè encie lori i sentimenti de patriotismo e de amour verso 'l nost caro Imperator. Ma i Fodomi no ne stei contenč ncora de avei mostrè demè fora del pais, cotant che i stima la patria del Tirol e l' Imperator, ma ia volù mostrè 'l patriotismo encie n tel proprio pais e lascè n ricordo ai fioi e a duč chi che vegnirà davò. Così ia pensè de onorè calla brava sovena, che del 1797 n te la viérra de Spinges defendava con gran coraggio, colla fourcia n te la man, la glièsia dai Francesi e ia resòlt, sa che le vivasta cincanta agn n te casta val e le stada sepolida n te casta cortina, de ie matte su na statua de brom sulla piazza dalla Plie.

L Comitè che sava formè fra i bersaglieri da Fodom à ottegnù 'l protettorato de Sua Altezza l' Arciduca Francesco Ferdinando



e l' à laorè tant, n fin chè con doni da pert de privati e de società  
l' è ste binè auna i soldi per paiè la statua.

La festa à scomencè la sára del 22 de šugn con fuoš su per  
le mont e con illuminaziön della Plie.



Catarina Lanz.<sup>1)</sup>

Su dilongia 'l taulač leva fat fora con lum le iniziali **K. L.**  
**1797** e così encie sulla cesa del comune leva l' iscriziön che se ri-  
feriva alla festa con lum elettriche. N tant vegniva sbarrè falco-  
nač e sulla piazza sonava la brava musica d'Ampaz, — che alla

<sup>1)</sup> Òra del liber del Dr. Vittur „Enneberg in Geschichte und Sage“.  
Cialède tel calènder ala pèrt 67.

scoutè sava binè a una na folla de šent. — Ai 23 da domán dalle siec la banda à fat 'l giro per la Plie sonán, per descedè la šent.

Puoc davant le 8½ sa binè sulla piazza dutte le compagnie dei bersaglieri: d'Ampaz, da Corvera, da Fassa, da Sta. Maria de Gherdana, da S. Laorenz ecc., i siori che rappresentava le diverse autorità e tanta de autra šent. Dalle 8½ l' Oberschützenmeister Genio Finazzer à tegnù n discorso sul significato della festa e l' à saludè i rappresentanti delle autorità e dutta la šent da dalonč e damprò.

Dalle 9 le ste na massa bassa n te gliesia e ntant la banda d'Ampaz à sonè la massa dell' Haydn.

Davò massa sa mettù su davant al monument vot tostate da scola, vestide de blanc, e una de caste, Emma Lezuo, à rezitè na bella poesia, fatta apposta per la festa. Dellongo davò le su sul palco, fat apposta, 'l Sior Prof. Dr. Tone de Sisti a tegnì 'l discorso per la festa.

La descorast proprio bel, che a duč ia tant plasù, e le parole che vegniva dal cuor i se le recorderà duč. N tel suo discorso la spieghe perciò che le vegnù metù monumenti ai eroi tirolesi e proprio, perciò che le stè fat cast alla C. Lanz.

Plu n navant l' à contè, come che i Francesi ieva vegnùs n te le val del Tirol, come che ieva rui a Spinges e che la Lanz defendava la gliesia colla fourcia n te la man. N ultima l' à descrit n curt la vita della eroina e come che la no volava mei che se savassa le prodazze, che dalla ava fat n te la vièrra, e che le stada cuoga del curat da Col e po del benefiziàt d'Andráč, ulà che le encie morta del 1854. La compagnia dei sizzèr da Fodom l' à accompagnada alla sepoltura e ia fat i onori come an saudè.

E pó la scomencè per fodom e 'l ia dit a le fámene: »La festa dan cuoi le n prum luoc na festa per le ale, fodome e badiote; le pur nasuda Catarina Lanz fora n Marebbe e la passè, davò 'l coraggioso atto fora Spinges, dutta la sua vita caite, n ta Fodom. On metù sto monumento proprio chilò dilongia gliesia, affinché ogni outa che passei chilò per si a massa, ve recordeibe encie che ei da nsignè ai vuoš fioi colla religiòn, encie l' amour alla patria, al Tirol, al bon Imperator. Vos che nsignei ai vuoš pìcoi la favella, a clamè pére e mére, vos che nsignei 'l padre nostro e i comandamenti de Dio, vos che nsignei che i obbedisce al pére e alla mére e ai superiori: vos sei calle, che ei da mate n tel pico cuor dei vuoš bambins enče calla plantesella che se clama amour alla patria, al Tirol e al vost Imperator.«

Davant de fenì 'l discorso l' à dit circa caste parole: »Nos omign volón conservè con gran cura cast monumento che ne recorderà dagnara come la sóvena da Spinges e tan de omign ia combattù nei dintorni de Spinges. Degugn al mondo sarà bogn de ne tò dal cuor i sentimenti de amour alla patria, alla religion,

e se 'l nost Imperator assa da clamè alle erme e che le ciampane sonassa ciampana martel, nos Fodom, dal prum n fin all'ultimo sonsa pronti come i nuó vegli davánt 100 agn, de lascè i beni, i soldi e la vita per Dio, l'Imperator e la patria.»

Alla fin del discorso le ste fat n fragoroso »Evviva« al nost bon Imperator.

L rappresentante de Sua Eccell. 'l Luogotenente, Capitano distrett. Dr. de Unterrichter, à ringraziè la šent da fodom e delle val che confina per la bella festa patriotica e desidera che 'l monumento sul confin della patria recorde alla popolazion le virtù dei nuos antenati e che 'l mostre, che la šent de caste val sarà e restarà dagnara fedele alla patria Monarchia.

Encie 'l sior Commissario provinciale superiore Bauer la portè i auguri e ringraziaménč de Sua Eccell. il Capitano provincial per la dimostrazion patriotica dei fodomi. L Capo del Comitè, Genio Finazzer, à spò svurandè 'l monument al Comune che 'l à tout n consegna per mezzo del Consiglier comunale Lessio Lezuo. Cast à ringraziè e à npermettù de čialè che 'l monument vegne ben tegnù, perchè 'l reste n abbellimento del país e chè la soventù se recorde dei atti che à fat i antenati, che i se recorde de lori e che i se tole n bon esempio.

Adès se trattava de onorè ncora i siori vegnús adallerg col sfilè dei bersaglieri. Chis sa metù su n fila, compagnia per compagnia e po ie passei per la piazza davant ai siori che rappresentava le Autorità. Cast le ste n bel momento che à fat a duč impression a vedei a passè i sizzer delle diverse vallade e con strane mandure e erme curiose. N' eva un da Corvera che ava na fauč fora n som n mane. N ultima della fila le passè n čiar dalla posta, decorè con bandiere, taulač vegli, e la ite leva monte i plu vegli bersaglieri de Livinallong e Corvera: Berba Beppo de Schneider, Francèsc Cherlo de Palla e Battista da Corvera.

Così duč i bersaglieri ie sus su al stand del taulač e iló 'l capo dei bersaglieri Genio Finazzer à saludè n davò con belle parole i sizzer e l'à dit, che 'l Schießstand sarà dagnara per esercitè la soventù a manegè ben 'l sclop e a defende la patria. La spò fenì 'l discorso coll' nviè 'l sior Tenente Colonel Soratroi a trè 'l prum colp. Cast la ringraziè per l' onour che ie ste fat e l' à dit, che 'l se rallegra del sentimento patriotico dei Fodom e che le superbo de esser encie dal n Fodom. Ntant che 'l se preparava a trè, 8 tosate vestide de blanc ia čantè la ciantia: »Trarre al bersaglio, ah, questo è pel Tirol.« Casta čančon è stada composta dal defunto Dégán Zardini per berba Seppl Finazzer, n occasion che cast del 1851 à riportè l'onour de »Rè dei Bersaglieri« all' i. r. tiro de bersaglio a Innsbruck.

Appana fenida la ciantia, che a duč ia plasù, 'l sior Tenente Colonel à lasce si 'l colp ben mesurè e ben tocchè, e po encie autri bersaglieri a scomencè a trè, e ia trat fin da sara tert.

Sun piazza dalla Plie n' tant iava scomencè a vane viglietti del vaso de fortuna e a spartì fora i premi de piérpoi che chi che comprava vegniva coi numer. Valgúgn fasáva n burt mus, canche n vezze den bel premio, che i se spettava, i ciapava chelche trapola che no valava nia. Autri ciapava de bieì premi e i sen siva contenč. Per devertì la šent leva encie de autri šuos, per esempio na breia co na lors fatta su e n buš n ta mez, ite per cal che se tirava de piccole balle de leng.

Mi no nè provè a trè, ma mossava ester difficile a tocchè, perciè e vedù che tanč fallava 'l buš.

Così fra divertimènc e la musica che sonava ogni tant, e le ciacolade fra amici e conosenč, le passè cast bel dì, che restarà per tanč de agn nella memoria dei Fodom e de chi che è vegnùs alla festa.

A. Lezuo.

## La catacombes de Roma.

Chi che va a Roma, — de Gherděina n-ie-l bôle sta truepes, — uel 'nce udèi la catacombes. Cie che 'l ie la catacombes, dëssa cuntè a chēi che ne 'l sà, bōl 'n curt 'l calēnder da chest añ.

'Ntēur duta la zità de Roma ie-l, šiche te duta la vōdla zitējes, de gran murēdes grōsses y autes, cun ugnitānt na pōrta o 'n purtōn. Zirca mōž' ěura da lonč da chesta murēdes ie-l, ěnche dut 'ntēur pō-ŋ dì, na gherlanda de rata cincanta curtines, ulà che ie unì suplii i crestiāns di trēi prim sēculi dō Gešú Cristo. Ma chesta curtines n' ie š'che la curtines dal dí da 'nuei sēura tiēra via, ma les ie sot-a tiēra ite. Y chēsta curtines se tlama catacombes.

La parōla catacomba uel dì fōssa o sepolcro. Bōle i vōdli Romani y i Ğudieres òva la usanza de s' anegnē te si pušions o prēi 'n luec per suppli si mōrč. 'Nsi à 'nce scūmencià i prim crestiāns, spezialmēter i riches, a suppli no mè i defonč de familia, ma 'nce d' autri te si pušions, perciè che ugni bon crestiān se teniva unerà a pudēi avēi te si curta 'nce d' autri crestiāns, mašimamēter can che se tratōva de tēi, che fōva unii marteršēi per la fōde. Chesta curtines o catacombes pōrta per 'l plu l' inuem del segnēur o dela segnēura, che les à fates fē, per ešēmpio: la catacombes de Domitilla, de Priscilla; autra catacombes à si inuem dai Sanč, che fōva unii suppli ilō, per ešēmpio la catacombes de Santa Felizita, de Sant' Agnes, de San Valantín, de San Callisto, de San Bastián,

La catacombes pò-η paragunè a tunèi strēnč, ma lonč, giavèi òra sot-a tiēra ite. Ugni catacomba n-à de plu de tēi tunèi, che va un tel auter, de maniera che chi che ġissa sēul te na catacomba, ne se 'ntupēssa mèi plu òra. Sà-η bēn che tela catacombes ie-l 'n scur teribl. Perchēl ġiata ugnún, che va te na catacomba, dant al dut 'n cēire 'mpià y pò vēgn-el 'nce menà da 'n uem, che spiega chēl che ie da 'spiegghè y che conta, chi che fòva tlo y iló suppli. 'N gran pèrt, se 'ntēnt, se trat-el de Sanč y de Martiri di trēi prim sēculi dō Gešū Cristo.

'Mbēn, zēn ulóns ġi cun cheš uem, che nes mēina, y udēi cò che na tēl catacomba cēla òra.

Generalmēnter va-η ġu per na šēla plu o mancūl longia, y ruva pò te na pitla capōla o pitla dliēša, che ie mò linēusa y ulà che 'l vēn suēnz dit mēssa. Da chesta capōla de-mōz scumēnc-e-η pò, cul cēire 'mpià tla man, a ġi òra per bušes o tunèi scures, che ie bēn tan auč che la stuves plu autes te Gherdēina; dunque de petè su sot n' à-η drē' d'avēi tēma. Ti parēies de chiš tunèi ie-l da una pèrt y dal' autra ġiavà òra nichies tan longes y tan lērges che òva drē' lērc 'n vašōl da mòrt. Chesta nichies ie una sēura l' autra, a prēša puec š'che la ciaužōles de 'n cassabānc o de 'n castl; te ugnuna univ-el metù ite 'n mòrt, ugnuna univa pò fata prò cu na plata de zieghel o de miērmul. Sun chesta plata fòv-el scrit l' inuem del mòrt, l' añ y 'l dí de si mòrt; sun vèl plata univ-el 'nce depēnt su figures, per ešēmpio 'l bon pastór, l' aduraziōn di trēi rēies, 'n pēš, che significa 'l Santísimo Sacramēnt del Autère. Al dí da 'ncuei vēig-e-η mè plu puecia nichies, che ie stlutes cun chesta plates; la maġra pèrt dela nichies ie daviērtes y, se 'ntēnt, uetes, percie che i corps di Sanč ie unii tēui de-mōz y mandēi òra per la dliēses de dut 'l mont; mè te datrai una de chesta nichies ie-l mò vèl òs, per ešēmpio 'n cē, o 'n brač o na ġiama de 'n mòrt.

La maġra pèrt di mòrc univa suppli te tēl nichies. I riches per auter òva tela catacombes per sē 'nstēš y per duta si familia 'nce de gran mašōns, che se tlama cryptes. Iló univ-el metù i vašiei, che a chēi tēmpes fòva per 'l plu de sas, a lingia via per fonz. Chesta mašōns fòva bōl depēntes, òva per 'l plu 'nce 'n autère, ulà che 'l univa dit mēssa oder teni d' autra funziōns, mašimamēnter 'l di del aniversario dela mòrt di defónč, che fòva suppli iló. 'Ncui cun dí ie chesta mašōns ēnche uetes; al plu che 'η vēiga mò la luegia o la mēisa del autère y vèl pitures o scritures su per i parēies.

'Nši dunque va-η òra per chiš tunèi o bušes scures da un al auter, su y ġu. Diše su y ġu, percie che 'η ne va-pa fort ala 'ndrēta. La gauša ie, davia che, can che una catacomba o curtina fòva plēina de mòrc, 'n ġiavòv-u-η òra n' autra de sēura o de sot, y

'nši ie-l catacombes, che à gor cin partimēnč. 'N pò se 'nma-  
ginè, tan sot che 'η muessa ġi te tiēra per revè al partimēnt ġa-pō.

La catacombes dunque ie luēš da respetè y da venerè, percie  
che iló ie-l la tombes o fòsses de truep mīle Martiri y Sanč, che  
à cunfessà la medōma fōde crestiana che nēus cunfessón y che  
ulón dò si ešēmpio fedelmēter cunfessè fin ala mòrt.

Segnēur Antòne da Fussèll.

## Na ciántia per 'l Primiziánt.

Ie ve salude, bon Segnēur Primiziánt!  
Chēs ie per nēus 'n gran dí sant,  
Na gran legrēza ie-l per duč, 'nce per mè,  
Chesta gherlanda je pudēi ve prešentè.

Vo fais ēnche 'n tēl pitl mut,  
Y zēn sēis chēl che vèl 'l plu de dut.  
Sēis chēl che fēs 'mpō de Die;  
Gešú à dit: »'L ie šiche fosse je.«

Na sēul paròla 'l fēs unì sun nōš autère.  
Tan ubedient šiche n' jēde a si pèrè;  
Da iló pò, — bōna ġēnt, pensēde —,  
Te mi pitl cuer chēs 'l prim jēde.

Pò tanč 'ncuei y da-mo-in-la  
Chesta grazia per vōsta mans giatrà,  
Y 'l perdón de si picēi a trueps sarà dat,  
Ah, cie gran cōssa che Idie de Vo à fat!

'L bon Segnēur per chēs sibe laudà y rengrazià,  
Vo drēt de cuer da nēus congratulà,  
La santa benedešión prions per dui canč,  
Acìò che Vo y nēus uniōns 'n di sanč.

Segnēur Ušōp.

## La cuces da Nadèl.

'L fòva n' jēde 'n gran segnēur, che ie ġit na sēira te 'n  
teater de zità y à udù iló na ciantarina, ch' i plašōva termēnt.

L' auter dí va-l, bōl da macarón, zēnza se pessè ġiut, de-  
bòta y compra dodeš cuces 'ndurèdes, les ġēura su dutes, mēt ite

t' ugnuna 'n zechín, les 'ncòla inò, scriš 'm pue' de lētra, fēs ite dut te 'n papiere y dà 'l pachètl a si pedienter, che 'l dēssa 'l purtè a chesta cumediantra. 'L pedienter va bēn debòta, ma 'l fòva 'nchel dí 'm puè lize y da pantán, y ēl te na prēša sflōl-el, toma sul pachètl, y duta la cuces tel pantán! Cie spavēnt, se pēns-el, tēl cuces tan da ledám ne pōss-i mèi purtè a na tēl segnēura.

Iló dlongia fòv-el na tēl bōna vōdla buteghiera, ch' òva ēnche tēl ròba da vēnder. L' à udù y se menòva adōs piciá de cheš puere ciorca, che la i fòva gita tan mèl. Pò diš-ela: »Je te les barate bēn, je, še t' ues; te me dēs 'm pue' de vèlc gonta; tlo vēgn-el per 'l sòlit mè tēi puere cōši a cumprè ite, chēi n' ie-pa tan mueleş; pò pōss-i-pa bēn 'nce i-les dē 'm pue' miēur marciá.«

'L pedienter i pieta 'n da-sòt gonta, y 'l barát ie fat; pò saut-el cula cuces y la lētra da chesta segnēura, aspieta su na respòsta y s' en vēn inò a cēsa.

'L patrón 'l damanda: »Cie à-la-pa dit, ch' la bōla?« — »O, l' à bēn rot su 'n valguna cuces, pò les à-la širmēdes gūn mespies cun na drēta luna.«

»O, se pēnsa 'l segnēur, zēn vēigh-i bēn, che cun tēl cume-diantres n' ie-l nia da 'nfè, tēl gēnt n' ie mèi cuntēnta.«

'Ntant ie passēda na tēl puera fēna dlongia ch' la pitla butēiga via, pò svēja òra la cramra: »Landa! ne cumprēis-a nia vèlc per vōš pitli zēn per Nadèl?«

»O Die, 'l fossa liēr cumprè, še 'η n' ēssa tan la stēnta; avēi puec y nia da majē y mò ulēi dì de cumprè tēl ròbes!«

»Unide pu 'm pue' ite, anda Mariēusa, cialēde, tlo ēss-i 'n valguna cuces 'ndurēdes; chi pitli ēssa segúr na drēta leggrēza; 'n fossa dodeš, les ie danz 'm pue' da ledám, ma ve-les dē-pa 'nce bon marciá defín; me dašēis doi da-sōč, pò ie-les vōstes.«

»No, plu de chindeš šòldi ne pōss-i pròpi no ve dē, che nen è 'l muet.«

»Bēn. bēn, pò 'n nòme de Die, tulē-ve-les mōfun.«

Can che l' oma ie revēda a cēsa, pò à i mutóns, che aspitòva bōle èrt che la unisse, bēn scumencià debòta a rumpì chesta cuces. Po, cie marueja! Dlonge fòv-el 'n zechín d' òr la-ite. Pò svēja l' oma: »O, ma 'l bambín Gešú ie bēn tan bon cun nēus, 'l savòva bēn, ch' on tan la stēnta.«

Ma da sēira, can che 'l père ie revà a cēsa y ch' i i-l' à cuntēda, s' à-l prēš pensà, che 'l muessa vōster sta na sbaliēda de zōche sòrt. 'L dí dò a-benēura tōl-el la cuces rotes y i zechíns d' òr y va dala buteghiera a damandè, cie y cò, y a 'nriešer cie che 'l pò vōster stat. Chēsta y à pò cuntà, che l' à baratà la cuces al pedienter de tēl y tēl segnēur. 'L puere paur, galantòm, va dal segnēur y ti conta la stòria, dut cò che la ie suzeduda. Pò diš 'l segnēur: »Argá che la ie gita 'nši, te don-i la

cuces cun zechíns y dut. N' auter jēde cialerè-i de fè del bèn,  
ulà che 'l toca. Son cuntēnt, che la ie tumèda òra 'nši.»

Sèpl da Passua.

## La fertuna.

Fertuna ie 'n uciöl  
Pià y žarà te gábia;  
Legrèza mostr-el revöl,  
Ma 'nce tristèza y rábia.

'N muessa vöster atēnt,  
Acìò che 'l ne s' en vède,  
Percie sarà rie termēnt  
A 'l piē 'n segundo jēde.

T. P.

## La zintling.

La zintling! audiēis-a sunàn  
La ciampana, bōl plan: bin ban?  
Tan plan che la sona, tan plan,  
La ciampana, l' audiēis-a sunàn?

La pitla, ciuldí che 'ŋ sona,  
I no la granda bōl plan,  
Damanda 'l pitl al' oma,  
Spaurì, bōlau bradlàn.

I uedli 'n gota, l' oma  
Respuent a si pitl fi:  
»Percie, — percie ch' i sona?  
Ne pòsse, — ne pòsse te-l di.«

'L père, per ēl sunòva  
La pitla ciampana, tan plan,  
Per ēl chest' oma bradlòva  
A messèi l' audì sunàn.

La zintling! audiēis-a sunàn  
La ciampana, bōl plan: bin ban?  
Tan plan che la sona, tan plan,  
La ciampana, l' audiēis-a sunàn?

T. P.



## La val de Gherdëina.

Gherdëina, bōla valèda,  
Gherdëina, bōl rusnè,  
Gherdëina, bōla Gherdëina,  
T' ame plu che mè.

Saslónç y Pič y Cuca,  
Da Bula 'nfin Mastlè,  
Da Plan 'nfin a Pruca:  
Cialè s' en pò-η assè.

Tèi crēps y prèi y monč  
Ne vëig-urη segūr inió;  
Sul mont no lèrc no lonč  
Ne ie-l plu bōl che tlo.

Gherdëina, t' ies furtnèda;  
Unëur a chi pò dì:  
Gherdëina, bōla valèda,  
Cie bōl a vōster ti fi.

T. P.

---

## La rie fëna.

O tu puere, puere mat,  
Tu totl, cie ès tu mèi fat,  
A maridè na tël rie pesta,  
Che te ciavatōa drèt la cresta.

Dan maridè i fòva dut bōl y drèt,  
Ma la òva ite 'l maladèt:  
'Ntan che la se stilòva drèt valènta,  
Sul cē te fašov-la suēnz la pulènta.

Dì mè vèlc zën! pò ies 'n mušát,  
'N totl, 'n ciavón o gor 'n mat;  
Èila à dagnëura sēula reğón,  
Tu ies mè for 'n puere macarón.

Siche na vōra tanaja Mariëursa,  
Èila sēula tēn y mēina la bëursa,  
Y še tu ues datrai 'n da-söt,  
Te respuenderà-la snöl: slöc, slöc!

Per zandli, pintes y per se šichè  
A-l' èila dagnëura gròs assè.  
Ma še tu adròves 'n cē de guant,  
Pëtla mè tu! 'l ie-pa de-bánt!


O te ies bēn 'n puere scafaròt!  
Ulësses datrai t' en böver 'n gòt,  
O fè vèl jēde 'n pitl gūec:  
Pruibì, pruibì! spieta 'm puec!

Suēnz de nuet, per avēi si böla ghenèda,  
Se stiel-ela finèda o gor amalèda,  
Y pò muesses mōfun tu levè su,  
Y pòsses tu chi pitli sujē gū.

Craugnē, svajē y petè gor,  
O, chēl te fēs-ela bōl for.  
'L ie 'n spavēnt, per dieša stēila,  
A messēi avēi na tēl rie èila!

Je ue bēn giēn i bincè 'l paravis,  
Ma mè-drē' 'm puc' prēs, še mèi che la gīs,  
Percie 'η ne la tēn prōpi no òra,  
Pra na tēl èila va-η bōl 'n malora.

Franz Moroder.



## Mi ciasòta.

'L fòva na pitla ciasòta, a la bòna, de lēn,  
Ma la fòva mia, y blòta, y da stē giēn;  
La rōndules, muntres bōle da dumán,  
Šulòva ite y òra se-la ciantàn.

Tela chēurt òv-i 'n dròc cun si funtana,  
Cun èga bòna frēša y sana;  
Y dan cēsa fòv-el 'n tēl pitl verzón  
Cun ciblóns y salata de cheršón.

Dò cēsa, te si pitla stala, mi zieba, la cēura,  
La gialines y 'n gial che cherdòva bōl a-benëura.  
Te stua, sun balcón, la gábia cul uciöl  
Y mi bon Pimperle sun ban da furnöl.

Chěš fòva dut mi pitl avěi,  
Che giut cuntěnt è-i pedù me gĩauděi;  
Ma lauràn y sparagnàn šiche 'n bon fant  
L' è-i meněda pròpi šaldi inánt.

Pò can che la fertuna m' a fa ric  
Y di granč 'l cumpagni y amíc,  
Mi pitla ciasòta ne m' à plu scusà,  
Y per puec a fulestieres l' è-i data ca.

Žěn è-i na cěsa pròpi da gran segněur,  
'Nğegněda ite dò 'l plu bۆl y 'l miěur,  
Y cun duta la comoditějes le-prò,  
Y pedientri che me servěš dant y dò.

Žěn ěss-i běn dut 'l bۆl y tan 'l muet,  
Ma mi cuer se sěnt 'mpò puere y uet;  
Mi pitla cěsa, ulá ch' ě passà alōgra giuventú,  
O, chěl ne ie mi bۆl y gran paláz měi, no, no, měi plu.

Truep gròš y truep avěi, ne 'l cherděis,  
Dà gran festiděš, ie suěnz de pěis;  
La pěš del cuer y la vóra cuntentěza  
Dà mě 'l fě del běn, ma no la gran richěza. F. M.

## Ěnche 'n festide.

(De na vۆdla muta da orden.)

Puera Mariěusa ie ġu a liet,  
Ala mòrt pěns-ela suěnz bۆl a chiet;  
Ma a murì ne ie-la-pa nia grama:  
Cie ulěis-a? la ie tan na bۆn' ana.

Ma 'n festide à-la 'mpò te si últimi dís:  
Cò cialerà-la měi òra la-sú sun paravís?  
Sarà-l-pa běn dut al orden y drět;  
Dut te si luegia, rumà su y nět?

Chi bieci troni ne sarà mia no da taces?  
I firònghes y i tepichs fۆrši da maces?  
La snۆles, la lampes, i viereš běn puzeněi?  
La měises, i banč y i fonč běn lavěi?


Y chi pitli ángiuli, cun si tripè,  
Ne desmencerà mia, cie ch' i èss' da fè?  
Sà-η bèn! cul nòte de sautè 'ncantèur  
Desmencerà-i bèn datrai de fè si lèur!

Y 'l bon san Piere dala gran tlèves,  
La bërba 'm pue' da tabác y da sbèvies,  
Lašerà bèn mè ite l' anes pies  
Y no fòrši 'nce vèl lotri o stries?

In Gottsnomen, ue bèn giën murì,  
Pò can che ruve sun paravís 'n dí,  
Pò ue-i-pa bèn drèt me purvè,  
Ulá che 'l fos bušèn de cumedè.

Pò ue-i-pa bèn de dut m' en curè,  
Mè-drè' che 'l bon Die me laše fè,  
Percie orden dē-l vòster dlone, y cis  
La-sú te chel bōl gran paravís.

Franz Moroder.



## La benedešión de mi père.

Ġnudlà pra liet del père stašòv-i bradlàn,  
Y ēl zitràn sul cē m' à-l metù la man:  
«Che chel bel Die te benedēše, o mi fi, mi fi!»  
Chēsta paròles, dut da dēibel, ma tan de cuer m' à-l dī.

Pò ie-l mòrt, y no gròs no ròba n' à-l lašà;  
Ma cialēde, pur empò si ērp je son sta;  
Percie na gran fertuna, la miēur arpeġòn  
Je stata per mè si santa benedešión.

Y pra duta mi fadiēs y mi lèur  
Per me vadagnē 'l viver cun unēur  
Me cunfòrta mò for 'n tēl pensier: de senti  
Sun mi cē la man del père che m' à benedi.

Dò 'nlēuta tan de tēmp che 'l ie bōle passà,  
Y tēi pitli «Père, père» suēnz m' à cherdà;  
Ma for can che me lecòrde de 'n chēl dí,  
Me sēnt-i 'nce je de 'n bon père 'l pitl fi.

Franz Moroder.



## Doi vödli Gherdëines.

»Bon dí, cunsuegher!<sup>1)</sup>

O bon dí, bon dí, Ġan Mëine, cëla, cëla; chi che 'η vëic n' jëde sun chiš auč; me dë del am.<sup>2)</sup> che 'l ie 'ntervenì vëlc.

»Ši, ši, Odl, áres<sup>3)</sup> che t' ès regón, chi ch' à mutóns, à nuvöles, y davia de chël vëgn-i da tè per cunsëi.

»O mai, mai, pò ne vëgnes-a pra 'l drët; è-pa massa la vëta gròssa; pòsse bën šaghè de cie che se trata, ma laša audì.

»Pu sës bën, 'l ie ch' l mëur,<sup>4)</sup> a-pëina che 'l à 'm pue' de do-bra,<sup>5)</sup> ulëss-el möfun che 'η i ciulëssa la brëjes,<sup>6)</sup> 'l aspjeta èrt che 'l pòsse ġi cula schiera,<sup>7)</sup> la tlappes<sup>8)</sup> à-l bôle 'nġignà; ne mancia auter che 'l vödli i laše la covà y vëde tòš a fè tiëra da buchëi.

»O plan, plan, a chëles ne sarà-la-pa mò, še bën ch' i nes zëra ġu i fiëres a nëus vödli 'ngali; ma cie ues-a, la ròda va 'ntëur y nia marueja, che 'l bot,<sup>9)</sup> dò che 'l à fat la manjes<sup>10)</sup> na uròla, uel la lašë stlefë. Laš-el fè mōša,<sup>11)</sup> tu arës bën plu blëita, t' ès pu ti pitla bicòca<sup>12)</sup> per tè, ti vödla y la budlëda,<sup>13)</sup> tuë ti pò-cseri<sup>14)</sup> y fë inò tèi gures<sup>15)</sup>, šiche te fašòves da ġëun, y laša rachernë 'l mut.

»Tu ès bøl dì, tu, ma še 'l n' ie mò regúš;<sup>16)</sup> cun si pesima<sup>17)</sup> se perchešënt-el<sup>18)</sup> a fè dut, 'l foja möfun y zabaricia,<sup>19)</sup> ma 'l ne sà da i dë ala stòla; 'l n' ie bon de ġi cul bigueč<sup>20)</sup> a tò na bëuša de fujám,<sup>21)</sup> ma bon vë de ciampi<sup>22)</sup> y de stadirë, de menë 'l regagni<sup>23)</sup> y de dë mëndes<sup>24)</sup> a dut; 'l stašëssa möfun sun piguel<sup>25)</sup> a cialè cò che 'l tēmp ura<sup>26)</sup> y a spië dò la cristiana.<sup>27)</sup>

O! y ëila, 'n urdëgni<sup>28)</sup> o gor na slabadausa,<sup>29)</sup> che šachinōa,<sup>30)</sup> cie conta-pa si bōla šëmia, can che la ie tan oda<sup>31)</sup> y de ġënt custengiona,<sup>32)</sup> nia de na bōna slacht;<sup>33)</sup> la sà möfun da fruetenë,<sup>34)</sup> mirë si antlaries,<sup>35)</sup> da crazë la bariles<sup>36)</sup> a si bimba; la ie bën bōla ladina,<sup>37)</sup> ma la sà a-pëina da lavë vël d' ašià, la cuġina 'n slabergòč<sup>38)</sup> y 'n passudáč,<sup>39)</sup> y pò à-la tòš fruà 'l infirà te ciu-lajón; 'l ie áres<sup>40)</sup> che la ne sà da i dë 'm pue' de salánč cul pivöl a 'n pitl, la n' à negún artën, y je me tēme, che sons tòš capëures<sup>41)</sup> cun doi tèi camenòstri.<sup>42)</sup>

1) Verschwägerter; 2) ich vermute; 3) freilich; 4) der Junge; 5) Bartflaum; 6) zum Besitzer machen; 7) auf Freierson; 8) Gescheidegeschenk für die Braut ('l bostl); 9) Bursche; 10) Liebschaft treiben; 11) selbständiger Bauer werden; 12) Häuschen; 13) das Mädchen; 14) Schnitzseisen; 15) schlechte Pferde; 16) fähig; 17) Ängstlichkeit, kränkliche-Verzagtheit; 18) sich sorgen; 19) nur kleine Verrichtungen machen; 20) kleiner zweirädriger Karren; 21) Laub; 22) streiten; 23) halsstarrig sein; 24) bemängeln (desbutë); 25) Söller; 26) wie es sich zum Regnen anschickt; 27) die Geliebte; 28) eine widrige Person; 29) liederliches Frauenzimmer; 30) kränkeln (St. Christina: šacagnë); 31) nachlässig; 32) boshaft, falsch; 33) Sippe, Geschlecht; 34) kleine Verrichtungen machen; 35) Krimskrams; 36) Tschoggeln am Ziegenhals (Wolkenstein: barigöles); 37) flink, leichtfüßig; 38) etwas schlecht Gekochtes; 39) dickes Gemengsel; 40) es ist voraus-zusehen; 41) zugrunde gehen; 42) ungeschickte Leute (Wolkenstein: cumenòster).

»O! O! tu vès bèn drē' massa inánt, Odl; 'l ne zima,<sup>43)</sup> che dişe truep, ma ti bot ie bōl ladín<sup>37)</sup> y šiche 'n tarz<sup>41)</sup> ti lēures grieves, negún scacarón, y še 'l tira dō tè, ie-l-pa bèn regús<sup>16)</sup> de fè si fač, ne se lašerà-l-pa dè maneš o šarnè;<sup>45)</sup> tu ies mè 'nši sudi-tēus,<sup>46)</sup> perdona che te-l dişe. Laš-el pu ġi datrai òra sun sedíl<sup>47)</sup> a ciudlè dō la budlèda;<sup>13)</sup> y pò chēsta n'ie-pa neguna lèlera;<sup>48)</sup> še fussàn ġēuni, nes cunterbēs-la<sup>49)</sup> mò 'nce a nēus 'l cē, y te sēs bèn, can che t'ies per maridè na muta, cēl-i n'jède al'oma, y tlo ne pò-la-pa falè prò ti fiastra<sup>50)</sup> Zēnza. Ne ġide-pa a se fè stē,<sup>51)</sup> y te sēs bèn: parè ie mè tizà. 'L mut à fat na bōna vèla, y ugnún uel se 'nġignè la cova. Zēn t'è-i dīt mi mēnes,<sup>52)</sup> nia 'm-per-mèl».

»O, vēighe bèn, che son perdù y che muesse dè dō; 'nce tu tēgnes dad ēi. In Gottsrōmen messerà-η mōfun se rēnder y se 'nġignè al' urtionga,<sup>53)</sup> ma Turtía, ch' la mēura,<sup>4)</sup> à-pa da stē pra nēus doi šagarēč<sup>54)</sup> y nes fleghè.<sup>55)</sup>

»Pu ši, ši, chēl farà-la-pa danz, chēla n'achtōa-pa<sup>56)</sup> chi ēi y ne ve lašerà murentè».

»Son pròpi cuntēt ch' è pedù me rušnè òra, y zēn ne ue-i-pa plu te tenì su; perdóna 'l disturbo y sta bèn».

»Fè-te bōl aut,<sup>57)</sup> Odl, y laše-te prēs inò udēi, vie plu revōl<sup>58)</sup> 'n vila can che t'ès blēita; salude-me la cumèra».

»Grazia, grazia, 'nce tu salude-me Cresēnza, y dī-i, che la vēgne n'jède ġu da nēus cul puntl».

Franz Moroder.



## 'N vödl jagher.

Sul' èlba,<sup>1)</sup> sul cherpè dela pitla dí<sup>2)</sup> traversòv-i via na tēl tēmpena, vèlc mušnējes, vèlc mò gonfes de nēif, che 'η fašòva 'n drē' purtoì<sup>3)</sup> y 'l me fòva aitel<sup>4)</sup>; can che ruve via da chel ma-šarēi<sup>5)</sup> sun puntón dai ròsč y che m'òve sgursà via dō 'n zimóc,<sup>6)</sup> fluternōa<sup>7)</sup> ca 'n tēl gran crutón<sup>8)</sup> y se laša ġu su 'n tēl vödl rus-cón;<sup>9)</sup> je auze la mira per la lašè stlefè, ma dan che la me vède cialá,<sup>10)</sup> fier òra de na tuta 'n luströl,<sup>11)</sup> y trēs cul uciöl. Sot-a mè aud-i tluchernán<sup>12)</sup> na zidrona,<sup>13)</sup> me pēnse, che 'l gial fosc

<sup>43)</sup> Sich ziemen; <sup>44)</sup> junger Stier; <sup>45)</sup> übervorteilen; <sup>46)</sup> mißtrauisch; <sup>47)</sup> Söller; <sup>48)</sup> Trottel; <sup>49)</sup> (den Kopf) verdrehen; <sup>50)</sup> Schwiegertochter (nòra); <sup>51)</sup> streiten; <sup>52)</sup> meine Meinung; <sup>53)</sup> Abfindung mit den abtretenden Geschwistern; auch Abschiedsmahl; <sup>54)</sup> alte, schwache Leute; <sup>55)</sup> pflegen; <sup>56)</sup> beachten; <sup>57)</sup> bleibe munter und gesund; <sup>58)</sup> oft; plu revöl = öfter.

<sup>1)</sup> Morgendämmerung; <sup>2)</sup> Tagesanbruch; <sup>3)</sup> tiefe Spur, Steig; <sup>4)</sup> früstelnd; <sup>5)</sup> Gerölle; <sup>6)</sup> verküppelter Baum; <sup>7)</sup> flattern; <sup>8)</sup> Alpenrabe; <sup>9)</sup> umgefallener Baum; <sup>10)</sup> losgehen (d. Schuß); <sup>11)</sup> Luchs; <sup>12)</sup> schlagen, balzen; <sup>13)</sup> Auerhenne.

ne sarà èndeno da-lonč y me striše dò tèi puróns ġu, me šlaich-nöje ite tla sienes dal tēune y aspiete che 'l aude suflán. Ma san Stenēur!<sup>14)</sup> 'mpò del gial aud-i sot-a mè ġu 'n ciampenamēnt de bacíns<sup>15)</sup> y po: flut, flut, flut, danter chi salandróns trēs fòv-el, y je òve inò fat 'n viač al vēscol.<sup>16)</sup> Pò me pēns-i, muesse pròpi ġi a udēi, chi che m' à sprigulà 'l gial; vède ġū ġun plan dai fò-leš,<sup>17)</sup> via per 'l piagn<sup>18)</sup> del ruf dala pujates y. ġu te troi paján: chi fòv-el? Bèra Stòfun, 'l ciavalè.<sup>19)</sup> chel stralòja<sup>20)</sup> dal supòl<sup>21)</sup> vèrt, cun si doi gures,<sup>22)</sup> che paussòva su 'n sturtón,<sup>23)</sup> se tulòva 'n trunc òra dela pitra<sup>24)</sup> y se ciablòva<sup>25)</sup> 'n njoc de fèur; 'l òva ciarià sù sun un ciavál doi baghes<sup>26)</sup> y sul auter na lagl<sup>27)</sup> y na bēusa de rauša,<sup>28)</sup> y dò ġiva na stērpa<sup>29)</sup> che 'l dòva menè via Nēifs.<sup>30)</sup> Fòve unit 'm pue' a remēur cun bèra Stòfun, percie che i òve giarà<sup>31)</sup> na tēl vòdla záchera y ēl me-la lunòva, cheš vòdl abrà; y 'n besère,<sup>32)</sup> šiche 'l ie, n' è-i ulú tlo inò i-la tachè; è scutà bōl chiet šiche 'n pavarùc dò 'n picuiel, y me tòle òra de purga 'n tò' de pulēnta, che fòva bēn prústia, ma bōna assè per trē a bo-cia<sup>33)</sup> dò 'l stracòis<sup>34)</sup> ch' òve fat chesta dumán, y 'm pue' de sbiaca<sup>35)</sup> ch' òve mò te zucia, la lavòva-pa bēn ġu.

Dò 'm pòz ie-l muet a ġi inánt, chel pòzigher<sup>36)</sup> de ciander,<sup>37)</sup> cun si hòches<sup>38)</sup> arbagutèi, dò che 'l i òva tra sēura la sòja.<sup>39)</sup> Je n' òve fat remida,<sup>40)</sup> ma zēn muev-i 'nce je: via per 'n tēl aršei,<sup>41)</sup> me tlupán mo 'n valgún šandliei<sup>42)</sup> per me saurè, su per tèi zupiei da pèr da pissulí, via per i ronč di Tuèi fina pra 'l šalpièr del dulà de Šádules, y me conce dò 'n salandrón per spiè dò gola<sup>43)</sup> ġu; ma nia ne se laša udēi, 'nfin che aude raušàn tel frusám<sup>44)</sup> dla da mè y che spriza òra 'n bōl bēc cui còrni da trēi zueches,<sup>45)</sup> ma 'n òve mò argónt ca mi drumblón<sup>46)</sup>, che 'l òva bōle fat 'l grop<sup>47)</sup> y che 'l fòva cun trēi sbalč òra de tir;<sup>48)</sup> je su, y še bēn che òve dlacíns<sup>49)</sup> ai pieš, riēs ġu per chi trēbeš, passe via 'l sedím<sup>50)</sup> da Fèur y la passadoja<sup>51)</sup> da Ciaslát, ulà ch' è scra-bucia<sup>52)</sup> su na turba<sup>53)</sup> d' archēč, ma 'l fòva dut massa tèrt, 'l òva bōle tajà via per i tlusici y 'l tamēiš<sup>54)</sup> de Grialēces dut de vòre stlōf,<sup>55)</sup> y tu saventà<sup>56)</sup> cēl-i dò zēn!

<sup>14)</sup> Ausruf der Enttäuschung; <sup>15)</sup> Pferdeschellen; <sup>16)</sup> vergeblicher Gang; <sup>17)</sup> Farnkräuter; <sup>18)</sup> Steg; <sup>19)</sup> Säumer; <sup>20)</sup> Sonderling, Hexenmandl; <sup>21)</sup> kurze Joppe; <sup>22)</sup> schlechtes Pferd; <sup>23)</sup> umgefallener, alter Baum; <sup>24)</sup> kleines Trinkfäßchen; <sup>25)</sup> kauen; <sup>26)</sup> Fellschlauch, Fellfaß; <sup>27)</sup> flaches Faß für Saumtiere; <sup>28)</sup> Blätter der wilden Preiselbeeren (granētes mates), die zu Somach als Färbemittel vermahlen wurden; <sup>29)</sup> alte Ziege, die nicht mehr trüchtig ist; <sup>30)</sup> Fassa; <sup>31)</sup> kündigen, einfordern; <sup>32)</sup> aufbrausende, jähzornige Person; <sup>33)</sup> essen; <sup>34)</sup> große Anstrengung; <sup>35)</sup> mit Wasser verdünnter Brantwein; <sup>36)</sup> kleine, dicke Person; <sup>37)</sup> Bote; <sup>38)</sup> schlechtes, altes Pferd; <sup>39)</sup> Saumgurt; <sup>40)</sup> ich hatte nicht die kleinste Bewegung gemacht; <sup>41)</sup> Gesträuch; <sup>42)</sup> Waldbeeren; <sup>43)</sup> Schlucht; <sup>44)</sup> am Boden liegende, dürre Reiser; <sup>45)</sup> Enden des Geweihs; <sup>46)</sup> Schießsprügel; <sup>47)</sup> plötzlich abschwanken, umkehren (vom Wild); <sup>48)</sup> außer Schußweite; <sup>49)</sup> kleine Eisballen an den Schuhen; <sup>50)</sup> Gemäuer, Ruine; <sup>51)</sup> Übertrittsbrett an Zäunen; <sup>52)</sup> aufscheuchen, aufstöbern; <sup>53)</sup> Haufen, Wolke; <sup>54)</sup> kleinsteniges Gerölle; <sup>55)</sup> schnellstens; <sup>56)</sup> du Prahler, du Gescheiter.

Ma a uet n' ulòv-i 'mpò no gī a cēsa, 'n tēl cūzīn sfulminà<sup>57)</sup> sarà-l bēn mò sa la fradojes,<sup>58)</sup> me pēns-i; ma 'l univa da Bulacia ca 'n drē' rabiòz<sup>59)</sup> y prēs sons ruà te na pluaca,<sup>60)</sup> ch' è metù man de fē pastöl,<sup>61)</sup> y che fòve cuntēnt che 'l fòva 'ngali bōl de-slīnc<sup>62)</sup> ite tal tiác<sup>63)</sup> del disē; iló sons stat sot, i ciauzēi sūtłòva y 'l curpōt ēss-uŕ pedù sturzē; da puent de sfessura univ-el gū na drēta ghemuera, y 'n valguna biēsēs blatēdes<sup>64)</sup> de Piere dal Bōc y si doi vōdla cueches<sup>65)</sup> arfōses y dal putl<sup>66)</sup> univa a dalērc dut sprigulēdes. Chel bardaša de disē s' en fòva mucia dant cun si fluč tacà te 'n pēdl y gā che 'l giangenòva<sup>67)</sup> tan, i è-i dat 'm pue' de ciašuel, zērze<sup>68)</sup> y rassēnt, y ēl m' à spòrt na basana<sup>69)</sup> che 'l òva giapà da si oma de lēn. Po m' è-i ciulà 'nteur 'l còl 'l fazuel<sup>70)</sup> y su bōlau 'nfin sul nēide. Na miērla<sup>71)</sup> ciantòva drē' tribel, tēi berloc<sup>72)</sup> y doi coches<sup>73)</sup> sūlòva 'ncantēur, y bōl 'mpont saut-el òra 'n liever blanc, y je ti stłōfe dō cun mi ram,<sup>74)</sup> y še bēn che la fòva 'm pue' curta, 'l è-i culetà sot-sēura.

Zēn fòv-i bēn cuntēnt y m' è spazà gū, y canche ruve gū dala zúfia<sup>75)</sup> de Sovia, 'ncont-i ch' la trancia<sup>76)</sup> de Turtia, strieva<sup>77)</sup> y cun si napla,<sup>78)</sup> che gīva cula bōna ueia<sup>79)</sup> su da Cresēnza, y je diše: »O, ie-l tumà ite 'l furnöl su dal giērvadēur?<sup>80)</sup> — »Si, si, respuend-ela, Cresēnza ie gīta a Roma, ma Ušöp ne ie-pa nia cuntēnt cu na tēl stłōta muta.« A, me pēns-i, tlo ie-l mieč no fē puce,<sup>81)</sup> cun ch' sta pusles<sup>82)</sup> d' ēiles, les vēn giēn a rusnē de ra;<sup>83)</sup> y trēs, gū da Gan Tōne, per me rusnē òra davia dēl ciamp dal acha,<sup>84)</sup> de chēl che l' an de spēda,<sup>85)</sup> y che je i ulòve vēnder cun lušonga,<sup>86)</sup> si fēna fòva a bailē<sup>87)</sup> y ēl ne s' à 'nfida a stlu 'l marciá, 'l se tēm tan dala gabōles,<sup>88)</sup> dala cialuja<sup>89)</sup> y da sant Afra,<sup>90)</sup> y 'l òva permò cumprà ch' la grúzena de Ronc cul mulin zēnza filamēnta<sup>91)</sup> y 'l se temòva dala mēssa a uš auta<sup>92)</sup> dela fēna, che fruetenōa plu giēn che laurē ala lērgia.

Can che gīve da Còsta ite fòv-el 'n tēl mut del ciašē<sup>93)</sup> de Fungēja che vardòva 'n pulerín y na bimba; 'l s'òva sgrafià sū sun' n lēn per mēter pēngula ai uciei, y je ti svēje su: »Cēla, ma mieč sun ti bestiám, che va a dañ«; y ēl tla sperduda chēga gū y se frantumōa<sup>94)</sup> na giana, ch' è abù 'n drē' lēur a 'l gūdē su y 'l trapinē a cēsa, ma per fortuna n' à giapà 'l pòder nia de rot.

<sup>57)</sup> Alpenhase, der nicht ganz weiß ist; <sup>58)</sup> Beschlagplatz; <sup>59)</sup> Stürm-wolken; <sup>60)</sup> Gußregen; <sup>61)</sup> ermüden, langsamer gehen; <sup>62)</sup> eben; <sup>63)</sup> alte, schlechte Dille; <sup>64)</sup> an einer Krankheit leidend (Wolkenstein: 'mblatēdes); <sup>65)</sup> alte, schlechte Kuh; <sup>66)</sup> die nicht gedeihen; <sup>67)</sup> lüstern sein (ghinē); <sup>68)</sup> trocken; <sup>69)</sup> eine kleine Garbe grüne Erbsen (cōsi); <sup>70)</sup> Halstuch (fazulēt); <sup>71)</sup> Singdrossel; <sup>72)</sup> und <sup>73)</sup> Alpengvögel; <sup>74)</sup> Schießprügel; <sup>75)</sup> kleines, schlechtes Haus (auch »Gütle«); <sup>76)</sup> Klatschweib; <sup>77)</sup> mager; <sup>78)</sup> weißes Trauerkopftuch; <sup>79)</sup> Weisses (cercuenia); <sup>80)</sup> Gärber; <sup>81)</sup> Komplimente, Umschweife; <sup>82)</sup> Tändlerinnen; <sup>83)</sup> Übles reden (Wolkenstein: rusnē 'n ra); <sup>84)</sup> Bock (ciavalón); <sup>85)</sup> strittig sein; <sup>86)</sup> Rück-kaufbedingung; <sup>87)</sup> Wöchnerin pflegen (fē la bëila); <sup>88)</sup>—<sup>90)</sup> verschiedene Ab-gaben; <sup>91)</sup> Gangwerk; <sup>92)</sup> scharfe, laute Vorwürfe; <sup>93)</sup> Sennerei; <sup>94)</sup> brechen, beschädigen.



»Zën va mè, me pens-i, še no Bōta sta cun festide.« Son mò cherdà pra 'l cramer y m' è fat dè per trèi lire,<sup>95)</sup> doi drairi y 'n laichter<sup>96)</sup> 'n puchl, 'n miuel<sup>97)</sup> de uele, 'm pue' de stupín dala lum, 'n maz de suplríns y 'n prisl per la fēna, y chēs ie stat bēn fat, che 'mpō de giapè la šopa y na bōna remanzina,<sup>98)</sup> šiche l' aspitōve, can che l' à udù 'l prisl, n' à-la dit patōla,<sup>99)</sup> y prēs m' à-la purtà su 'n bon crōsul, miēur ch' i gran ojes<sup>100)</sup> n' en à, y je me 'l è šuflà<sup>101)</sup> ite cul apētīt da jagher, y pō m' è-i petà via sun ban da furnōl, me l' è impizēda<sup>102)</sup> y se l' on cuntēda biei pacifici y cuntēnc mò giut ala longia, 'nfin che 'l fōva scurēnta nuet.

Zën v' en è-i bēn ciaculà su assē; la vōdla parōles, che ne vēn puec o nia plu adurvēdes, ve spiegh-i tlo per tudēsc; metē-les inò 'n drōva, y n' auter aī v' en dirē-i inò truepes d' autres, che è crit su y che m' è nutà su. Zën bōna nuet a duč!

Franz Moroder.

## 'N salút.

(Per nōš Segn. Pluván Franz Anderlan al' ucašión dela fōsta, che la cheimún d' Urtišēi i a fat per i dè 'l diplom de Ehrenbürger y liet dant sul bast di 18 d' Agóst 1912 da Franz Moroder de Lenērt.)

Cialēde tanč che 'ncuei s' à abinà 'ntēur  
A nōš Segnēur Pluván per i fè drēt unēur,  
'N unēur che 'l s' à tan bēn merità  
Dò vint aī de cura y dut chēl che 'l à fa.

Perdona, še 'ncuei je te dè del tu;  
Crē-me, chēs vēn de cuer mò tan plu,  
'L ne ie per mèla crianza,  
Sēs bēn, nēus poēč on chesta usanza.

Bōle da gēun nōš cumpagn' ies-te stat,  
Pò ti studi cun flais ès-te fat,  
Pò cun gran zèlo ies-te stat nōš caplán,  
Pò nōš curát y zēn d' Urtišēi 'l prim pluván.

Tu dirēs: »M' eis fat for mè bōl sul mus,  
Ma dò 'l spinēl truepa muejes y ferdrús«;  
Son danz puera gēnt, perdone-nes mōfun  
A mi, a Tōne, a Sèpl y a Stōfun.

<sup>95)</sup> Pfund = 12 alte Kreutzer; <sup>96)</sup> = 4 Pfennige; <sup>97)</sup> ungefähr  $\frac{3}{10}$  Liter; <sup>98)</sup> golinde Predigt; <sup>99)</sup> nicht das Mindeste; <sup>100)</sup> große Herren; <sup>101)</sup> schlürfen; <sup>102)</sup> anzünden ('mpizēda).

Tu t'ès 'ncurà de nòs bèn spirituel  
Y suvènz 'nce per tanč del bèn materièl:  
Tan de puereš y descunsulèi che t'ès ġudà,  
Y de manteni la pèš t'ès dagnëura purvà.

La curtina y la dlieša ès ġudà a 'ngrandì,  
Aciò che stašons 'n vita y dò mòrt plu sauri,  
Per la scòles y tan d'autra còsses truep ès fa  
Da vint aňi y plu, per nòs bèn ès for laurà.

Cun tan de dutrines, perdiches, 'nsegnamēč  
Che Tu t'ès purvà, che restóns bieci valēč.  
Ma tan suēnz ti amuniziós a puec ġuà,  
Y cò t'arà-la-pa pò tel cuer mujà!

Ma ch'l bōl Die tēn-pa de dut cont  
Y paja-pa autramēter che cheš mont,  
Y dò la fadiēs y 'l lēur de chiš pueč dīs  
De prēmio te don-el-pa 'l bōl paravís.

Ma no mò prēš, mò ġiut muesses stē  
Pra nēus y purvè de nes custemè;  
Ulessán 'nce nēus la-sú te fē cumpagnía,  
Še bèn che nòs merit sarà pitl o nia.

Y je è mò na gauša de me ralegrè,  
Per chēl è-i 'nce purvà tan bōl de ciantè,  
Percie je è fat gor 'n bōl vadagni  
A ġiapè 'ncuei 'n tēl bon cumpagni.

Žēn ēss-i-pa mi pitla ciantia bēn finà,  
Mē-drē che la v'ēss' scusà y no stufà,  
Pò ue-i-pa bēn inò na urōla bōl chiet scutē,  
Percie 'l ie-pa bēn 'n taicher per gherdēina a dichtenē.



## La grandēzes del mont.

Cula paròla »mont« 'ntendóns 'l ciel y la tiēra; al ciel i di-  
šóns 'nce 'l firmamēnt y ala tiēra 'ncē 'l mont. Dut adúm ie danz  
zōche de grant òra de mesura, zōche tan de grant, che nòs fer-  
stònt n'ie nianca bon de se fē na drēta idēa no de vèl tan de grant.

Sul ciel ie-l na infinità de stēiles, ugnuna tan granda, che  
degún ne se pò fē na idēa, y che 'l pēr na còssa che ne pòsse  
vōster, ma 'l ie 'mpò vēira. Danter duta cantes chesta stēiles

n-ie-l doves, che nes pèr a nēus 'n tòc plu grandes che duta l'autres: 'l surēdl y la luna i dišons a chēsta doves.

### 'L surēdl.

La stēila de plu gran 'mpurtanza per nēus abitānč dela tiēra ie 'l surēdl; māsima davia che 'l iluminōa la tiēra y che 'l la šauda. 'L surēdl ie 'n cōrp tan grant, che 'l mesura, a se pensē nā cōrda trata iust a mōz ōra, 193.030 miēr, che fossa 1,384.800 km; y 'l ie tan da lonč da nōsta tiēra, che 'η messēssa furnē 300 aņi dī y nuet sula ferata a muever te Gherdēina o te vėl auter luec sun nōsta tiēra, a ulēi revē le-prō. Y še fossa valguni sul surēdl che tragēssa 'n cic, bēn 'm pue' ad-aut mussēss-el cighē. pō metēss-el 14 aņi a ruvē ġu da nēus 'nfin che 'η 'l audissa. — Zēn mussēis savēi, che 'l ie stēiles mò plu grandes che 'l surēdl; pensēde ma pō, tan da lonč che les muessa vōster, argā che les semōja tan pitles.

'L surēdl pō-η dī che sta for adōs te si medōma luegia, ma 'l se muf 'ntēur sē 'nstēs šiche na rōda va 'ntēur al ašil.

### La luna.

Še 'l surēdl ie šaldi plu grant che la tiēra, ie al incontra la luna 50 jēdeš mēndra che la tiēra; y la ie 51.000 miēr (384.400 km) da lonč da nēus. La luna rōda ēnche 'ntēur sē 'nstēssa šiche na rōda; y pō va-la mò te  $29\frac{1}{2}$  dīs 'ntēur la tiēra. Y pervia che la tiēra va 'ntēur 'l surēdl y che la luna va pōa, va-la de trēi viēres: 'ntēur se 'nstēssa, 'ntēur la tiēra y cula tiēra 'ntēur 'l surēdl. Y la luna ne luna nia 'nstēssa, ma la vēm iluminēda dal surēdl; y al dō che la sta o 1.) danter 'l surēdl y la tiēra, o 2.) dō la tiēra, o 3.) da una pèrt o dal' autra dela tiēra ons 1.) luna nueva, o 2.) luna colma, o 3.) prim o ultimo chērt. Y 'nši for ugni  $29\frac{1}{2}$  dīs. Canche 'l ie luna nueva, pō revē la luna iust t' una lingia danter 'l surēdl y la tiēra y nes curi ite 'l surēdl: 'l ie na finsternus del surēdl, šiche 'l ie stat l' aņ passā; y canche la luna ie dō la tiēra, che 'l ie luna colma, pō revē la tiēra inō iust t' una lingia danter 'l surēdl y la luna: 'l surēdl ne pō plu nia iluminē la luna, y 'l ie na finsternus dela luna.

### La tiēra.

Še na pèrt de ġēnt ne uel nia drē' crēier, che 'l surēdl y la luna sibe doi cōrps tan granč, cherderà-i bēn al mancūl chēl che diše zēn dela tiēra. Chēsta pō-η pu muserē ōra a plu manieres.

Che la tiēra ie ēnche 'n cōrp turōnt, ne dubitērà plu ncuei cun dī, ulā che 'η pō ġi (cun ferates y bastimēnč) dut 'ntēur, mia no deguni. Bōla lizia dut 'ntēur šiche na turnēda de smauz no n' ie-la; ma per chēl ie-la 'mpō zōche de turōnt, a prēša puec,

n-ie-l doves, che nes pèr a nēus 'n tòc plu grandes che duta l'autres: 'l surēdl y la luna i dišons a chēsta doves.

### 'L surēdl.

La stēila de plu gran 'mpurtanza per nēus abitānč dela tiēra ie 'l surēdl; māsima davia che 'l iluminōa la tiēra y che 'l la šauda. 'L surēdl ie 'n cōrp tan grant, che 'l mesura, a se pensē nā cōrda trata iust a mōz ōra, 193.030 miēr, che fossa 1,384.800 km; y 'l ie tan da lonč da nōsta tiēra, che 'η messēssa furnē 300 aņi dī y nuet sula ferata a muever te Gherdēina o te vėl auter luec sun nōsta tiēra, a ulēi revē le-prō. Y še fossa valguni sul surēdl che traģēssa 'n cic, bēn 'm pue' ad-aut mussēss-el cighē. pō metēss-el 14 aņi a ruvē ġu da nēus 'nfin che 'η 'l audissa. — Zēn mussēis savēi, che 'l ie stēiles mō plu grandes che 'l surēdl; pensēde ma pō, tan da lonč che les muessa vōster, argā che les semōja tan pitles.

'L surēdl pō-η dī che sta for adōs te si medōma luegia, ma 'l se muf 'ntēur sē 'nstēs šiche na rōda va 'ntēur al ašil.

### La luna.

Še 'l surēdl ie šaldi plu grant che la tiēra, ie al incontra la luna 50 jēdeš mēndra che la tiēra; y la ie 51.000 miēr (384.400 km) da lonč da nēus. La luna rōda ēnche 'ntēur sē 'nstēssa šiche na rōda; y pō va-la mō te 29½ dīs 'ntēur la tiēra. Y pervia che la tiēra va 'ntēur 'l surēdl y che la luna va pōa, va-la de trēi viēres: 'ntēur se 'nstēssa, 'ntēur la tiēra y cula tiēra 'ntēur 'l surēdl. Y la luna ne luna nia 'nstēssa, ma la vēn iluminēda dal surēdl; y al dō che la sta o 1.) danter 'l surēdl y la tiēra, o 2.) dō la tiēra, o 3.) da una pèrt o dal' autra dela tiēra ons 1.) luna nueva, o 2.) luna colma, o 3.) prim o ultimo chērt. Y 'nši for ugni 29½ dīs. Canche 'l ie luna nueva, pō revē la luna iust t' una lingia danter 'l surēdl y la tiēra y nes curi ite 'l surēdl: 'l ie na finsternus del surēdl, šiche 'l ie stat l' aņ passā; y canche la luna ie dō la tiēra, che 'l ie luna colma, pō revē la tiēra inō iust t' una lingia danter 'l surēdl y la luna: 'l surēdl ne pō plu nia iluminē la luna, y 'l ie na finsternus dela luna.

### La tiēra.

Še na pèrt de ġēnt ne uel nia drē' crēier, che 'l surēdl y la luna sibe doi cōrps tan granč, cherderà-i bēn al mancūl chēl che diše zēn dela tiēra. Chēsta pō-η pu muserē ōra a plu manieres.

Che la tiēra ie ēnche 'n cōrp turōnt, ne dubitērà plu ncuei cun dī, ulà che 'η pō ġi (cun ferates y bastimēnč) dut 'ntēur, mia no deguni. Bōla lizia dut 'ntēur šiche na turnēda de smauz no n' ie-la; ma per chēl ie-la 'mpō zōche de turōnt, a prēša puec,

šiche na bala de nēif. can che 'η scumēncia a la fē, māsima še 'η tōl nēif dura: plēina de gòlbri y de buḡes.

Y la tiēra va ēnche 'ntēur sē 'nstēssa, tel tēmp de 24 ēura; 'nši devēnt-el dī y nuet, al dō che 'l luec, ulà che son, ie autà per-mōz al surēdl o de contra.

Y sun ch'sta tiēra sons nēus uòmini y duč pēr-el che stēbe tan giēn tlo, ch'i n'ulēssa mèi plu s'en ḡi. Davia de chēl me sà, che 'l paje la fadia de dī y de rusnē 'mpue' de vèlc de plu de chēsta benedēta tiēra. Dant al dut audide, cie che diēse dela grandēza dela tiēra.

Emaginē-ve, che fossa fat 'n bōl gran buš a mōza la tiēra òra, šiche te na bōstla de 'n padenòster. Še chēš buš fossa fat tan lère y tan aut, che 'η pudēssa ḡi sauri la-ite y trēs òra da una pèrt al' autra, pò adurvēss-uḡ iust 3437 ēura a ḡi trēs òra, chēl fossa 143 dīs y 143 nuetes, zēnza se fermē 'nvalgón a 'n tò 'n chērt. Y zēn 'nmaginē-ve che 'η traḡēssa na cōrda 'ntēur la tiēra, šiche 'n cērtl dut 'ntēur; na tēl cōrda messēssa vōster 40,075.000 metri oder 40.075 km longia; a ḡi a pō dut 'ntēur metēss-uḡ 900 dīs, a paussē y durmī de nuet. Zēn rat-i che pudēis ve fē 'm pue' d'idēa dela grandēza dela tiēra. O fōrši ve fašēis 'm pue' plu d'idēa, še ve diēse, che la lère ch' ie sula tiēra ie a prēša puec 10,000.000 jēdēs mò 'n tan granda che duta Gherdēina.

Zēn dela qualitējes dela tiēra. Trēi èlēmēnc pò-η desfrenziē sula tiēra: 1. 'n sut y dur, a chēš i dišóns fonz o-tiēra; 2. 'n mòl, y a chēš i dišóns èga; èga ie-l sul mont 'n tòc plu che tiēra; tiēra ie-l mè-drē la tērza pèrt de dut cheš mont; l'autra doi pèrtes ie èga (mères, lēč, ruves). 3. l'aria.

La tiēra fērma forma 5 pèrtes del mont: L'Asia, l'Europa, l' Africa, l' Australia, y l' America. La prima cater ie dutes sun una mōza pèrt del mont, l' America ie sul' autra pèrt y ie permò unida giatēda su da Columbus del 1492, dan 421 aṇi, dant ne savòv-uḡ nia del' America, y 'η ne savòva mò, che la tiēra ('l mont,) ie turonda.

Ora de chēl ie-l mò šaldi insules sul mont, de grandes y de pitles, y sula maḡra pèrt viv-el ēnche ḡēnt. Sula tiēra fērma ie-l pò de gran planadures, šiche tel'Italia, t'Ungaria y mò 'n tòc de maḡres n-ie-l tel'America. Monč 'y crēpes ie-l ēnche sēura dut 'l mont; 'l mont plu aut te duta l'Europa ie 'l Montblanc tela Sbi-zera, 'l ie 4810 mètri aut sēura 'l livòl del mèr. Ma tel'autra pèrtes del mont n-ie-l mò bēndebò de plu auč; i plu auč ie tel'Asia; ilò ie-l crēpes de passa 8000 mètri auč. Per ve fē na idēa mussēis savēi che Saslōnc ie 3178 mètri aut.

#### La población del mont.

Asia:	900.000.000 = 9 cēnt milións;
Europa:	400.000.000 — 4 „ „

Africa:	161,000.000 = 161 milións;
America:	144,000.000 = 144 „
Australia:	6,000.000 = 6 „

### I rēgnes del' Europa:

Austria-Ungaria:	45 milións abitanč
Ruśia:	130 „ „
Franzia	39 „ „
Prussia	38 „ „
Italia	34 „ „
Ènglònd	33 „ „
Spagna	19 „ „
Baviera	6 „ „
Sbizera	3 $\frac{1}{2}$ „ „
Sachsen	4 $\frac{1}{2}$ „ „

### Populaziòn de 'n valguna zitèjes:

Londra	7,000.000	Buda-Pest	700.000
New- York	4,600.000	Madrid	600.000
París	3,000.000	Leipzig	600.000
Berlin	3,000.000	München	600.000
Viena	2,000.000	Praga	600.000
St. Petersburg	1,500.000	Neapel	600.000
Moscau	1,000.000	Roma	600.000
Costantinopel	1,000.000	Milán	600.000

### Tel Tirol:


Dispruc	50.386	Ruverēi	11.600
Trēnt	27.000	Marán	11.200
Bulžán	24.000		

ie la zitèjes cun passa 10 mile abitanč.

### Pò d'autri lueś:

Ala de Dispruc	7000	Ampēz	3400
Schwoz	7000	Burnöc	2700
Persenón	6000	Tramín	2400
Gries de Bulžán	6000	Naimòrc	2400
Lienz	5700	Salēurn	2300
Kòltra	5000	Fedóm (Plief)	2300
Ciastöl	3500	Urtišēi	2124

Segnēur Batista da Sotanives.



# L' oma, ch' à metù sot ala gialines 'n dí del Avënt.

1. 'N dí del Avënt,  
Dal maġer vënt,  
Devënt-el te cēsa  
'N gran spavënt.
2. Da castl da spēisa  
Via pra mēisa  
L'oma desprēda  
Dut che bēisa.
3. 'N bon pastulà  
'Ncui vën fa,  
Tamešóns y ēga  
Bën mešedà.
4. 'Mpōa la lum  
Dut al-infúm  
Per corer te stalla  
A udēi 'l grum.
5. Pō-η se 'mpensè,  
Ce nòt' y ce fè, —  
Dut te fuec  
Sarà ġit 'l cafè.
6. Mutóns y mutáns,  
Giac y cians  
S'abina dan stala  
Y sauta y bala.
7. L' oma su l' ěura  
Va y ġeura  
Per udēi la gialina  
Cie che l' à fa da ch' st ěura.
8. Ce dlacià,  
Ce splumà!  
'N punšin  
T'lo bōl cherpà!
9. Gialines desprēdes,  
Mōzes d'acēdes;  
L'oma scumēncia  
A trē de gran brēdles.
10. »Tan bōlin,  
Puere punšin!  
Fòve per te vēnder  
D'instà a 'n patin.
11. Y zēn per ch' st aň,  
Che vën, ce daň!  
Te stua te pòrt-i  
Su bōl plan.»
12. Metù bēn blòt  
Te 'n bōl scafaròt,  
Medešina le-prò,  
Ġetēda te 'n gòt.
13. 'L òva 'l brušeur  
Y 'n rie culēur,  
Per chēl 'l à l'oma  
Metù sun fēur.
14. Dut al-infúm  
Te furnōl al-ingrúm  
Vencēes mò vērē,  
Che fēs 'n drē' fum.
15. Furnōl revënt  
Che 'l ie 'n spavënt.  
'L punšin che dlēiga  
A ugni mumēnt!
16. 'N 'l aut desdlaciàn  
Y le-prò crazàn,  
Bōl' ugni-tan'  
'N pue' šiblàn.
17. Cun na šadón  
Bēn smauz, del bon,  
Ti vegn-ēl dat ite,  
Che 'l vegnē inò 'nton.
18. Bōl 'mpont  
Cun chel drē' bon ont  
'L à-la, ma fat  
Unì al mont.

19. Inò te stala  
Purtà zēn 'l à-la,  
Dat da magē;  
Y pò s'en va-la.

20. Inò desfertuna  
Je-l unìt una  
Al puere punsìn,  
Che nen òva mò pluma.

21. Dlongia 'n pèl  
Da 'n pò de 'n vadöl  
Je-l unì sfrant  
'N dí de Nadèl.

22. Tel lèur de stridlè —  
Y 'l gial a ciantè —  
L'oma a 'l udēi  
Muessa bradlè.

Leo Runggaldier.

## 'L bambín da Nadèl.

Na pitla muta ulòva mèter na lètra te na scátula dala pòsta, ma la n' argüngòva nia su. Te chēla passa 'n segnèur, ti dà na udlèda a chesta pitla, pò lieg-el l'atrès y mèt la lètra te scátula. Su la cupèrta stašov-el: »A chel bōl pitl bambín da Nadèl sun Paravís.«

'L segnèur va te scritòrio dela pòsta y se fēs lieger la lètra.  
'L fòva scrit:

Bon bambín da Nadèl!

'N aut dišàn, che te pòrtes datrai tēl bōla ròbes a chi pitli; davia de chēl te prō-i-pa bōl, ne nes desminciē-pa nēus, pò ies-a drēt valēt. Te sēs bēn, l'oma ie for tan amalèda, mi frèdeš ie mò tan pitli, pò ons tan la stēnta: puec y nia da majē, deguna lēgna da šaudè ite, zēn che 'l ie tan frēit. Te sēs bēn ulá che stašov, òra 'nsom la cuntrèda dela pecúnia.

Valdalafám, 24. XII.

'L segnèur damanda dò y 'nrieš, che 'l ie pròpi na puera familia. Y da sēira à-l fa purtè da si fanč de drē cestóns de lēgna, de farina y de ròba da majē a chesta familia.

No mè la familia à abù de bōna fōstes. 'nce 'l segnèur fòva cuntēt d'avēi pedù fē tan na bòn' òpra.

S. da Passua.



## 'N puec per sòrt.

Sèpl 'mparòva da calighè y stašovà for sentà da man ciancia del mòster. 'N dí diš-el al moster: »Ne pudèss-i-pa nia stè sentà da mò-in-la 'n valgun' ònes da vòsta drèta pèrt?« »Ciuldí?« damanda 'l mòster. Sèpl: »Acìò che mi urèdla ciancia vègne ênche tan longia che la drèta.«

Segn. Batista.

\* \* \*

'L père damanda 'n dí ch'l Franzl, che va mò a scòla: Ès-a šaldi amič te scòla?« Franzl: »Nianca un no.« »Pu cò-pa 'nši?« Franzl: »Pu udèis, a chèi che me-les dà a mi, n'i ue-i je nia bon, y chèi che les giata da me, ne me uel nia bon a mí.«

Segn. Batista.

\* \* \*

Entendù fauz. 'N dí vèn tlamà 'l dutór da una dala veržura, che òva giatà 'n tèl mèl mè-drè' 'nši 'n aiet. »Eis-a bôle tēu ite vèlc?« la damand-el. »No vèl' d'ètra; nianca 40 šoldi no.«

Segn. Batista.

\* \* \*

'L vøre avarón. 'L dutor, ch'à messù ġi pra 'n tèl vòdl avarón, diš, canche 'l 'l à višità: »Ne pòsse plu fè nēt nia per vo, n'ie plu deguna speranza per vòš cašo.« »Si lauda Idie,« diš 'l avarón, »me temòve bôle, che messēs pajē 'n gran cont per la medegines.«

Segn. Batista.

\* \* \*

'L richter diš a bèra Mēine: »Me pèr, che te vòš luec ne sèbe deguni da i dè del »Vo« a ġēnt.;« Bèra Mēine: »Je n'i dè a deguni del »Vo« auter che a seġnēur pluván y a tí.«

Segn. Batista.

\* \* \*

Ušöp: »Tu Piere, ès-a audì chi che 'l ie mòrt inier? 'l aucát de Rain!«

Piere: »Pu no debánt, che l m'à mancià inier dut 'l dí la forcia.«

(Piere šagòva, che i malans ěssa, per tucē ġu drèt sot chēš aucát, cris adúm duta la forces, che fòva da giapè y ch'i s'essa 'mprestà 'nce la sia.)

Fr. Moroder.

\* \* \*

Èila: »Cèla mè-drè, tu carògna de lump che t'ies, dut battes trēs, pudessàn vòster riches, še t'esses fa drèt.«

Èl: »Ha, ha, je 'ncòghe al vòster ric je; dut ne pò avēi deguni y plu ciòc ch'je ne pò 'nce vòster 'n milionèr no.«

Fr. Moroder.

\* \* \*

'N fulestier damanda te 'n luec na tèl vòdla, te cie ustaria che l' fossa 'l mieč cherdè. »Pu, respuend-ela, ratèsse 'mpò mieč pra l'Aucia, percìe ilò tir-i òra mi ueim 'mpò bôle dala nuef.«

Fr. Moroder.

Bèra Levíš, 'l pöc, cumpröva for la farina da bèra Batista. Dui doi fòva galantömes, i se stimöva un cul auter y fòva stimèi da duč. Ma bèra Levíš fòva 'nce maladèt: 'l pesöva for la farina, che 'l cumpröva, mò n'jède. Y 'n dí vëig-el, che 'l en manciöva; 'l la pëisa mò n'jède; ne gòva nia; n'en ie de plu. 'L öva drèt 'ngërt, ma la borsa nen à amiczia: 'l va dal richter y ti-la conta. 'L mulinè vën tlamà y muessa tò pöa la stadiera. La stadiera giva bën. »Y, diš 'l richter, ulà eis-a 'l pëis?« Zën va bèra Batista te fuja, tòl òra zöche y diš: »Tlo ie-l mi pëis: 'n lòbl da 'n chilo de bèra Levíš.«

\* \* \*

'N pröve conta, che n' auter öva n'jède perdicà 'n Pasca de chel bül Die, che ie rešusità da mòrt. »Ce unëur per vo ëiles, diš-el, che 'l Segnëur ie cumparì 'mprima al' ëiles; ma nen eis drè' de vöster supèrbies per chël; chel bül Die à fat 'nši mašimamenter, aciò che la gënt vëgne plu riēs a 'l savëi.«

\* \* \*

Segnëur pluván diš 'n dí 'a 'n ciucón, che 'l ne dëssa böver tan d'èga-de-vita: »l' èga-de-vita te fës 'l mađer dañ.« »Pu, segnëur pluván, diš l' auter, perdichëis pu che dassón amè chëi che nes fës del mèl.« »Ö, ma ne perdiche mèi, che dassón i dlutì.«

\* \* \*

'N segnëur inglöš öva 'n jède n fant bën-de-bò frèt. 'N dí, che 'l ulöva gí a spaz, n' i öva 'l fant mò nia puzenà i ciaužèi. »Ciuldí n' ès-a nia bixenà i ciaužèi? 'l damand-el. »Pu, 'l ie tan bur tēmp, pò m'è-i pensà, che ne gòva 'mpò no nia: i vën inò da ledám, can che gëis òra.« Bon, 'l segnëur zëra la cësa-da-fucc y la mašòn dala spëisa, se mët via la tlè, se tòl sëura chiš ciaužèi da ledám y uel s'en gí. Zën vën l' fant a priè che 'l i laše tlo la tlè: »Ce ues-a fè?« »Pu, ulësse vèl' da majë.« »A, laša pu-mè, respuent 'l segnëur, ne gòva mpò no nia, can che 'l ie, giates 'nši inò fam.«

\* \* \*

»Chësta ne pò vöster, diš un, che Diëva sibe stata mò inu-zënta de-fin y s'èbe 'mpò lašà trè al mèl dal malán.« — »Chël bën segura, i respuent l'auter, che še la fos stata tan maladëta che l'ëiles dal dí da 'nuei, ëss-ela ëila trat al mèl 'l malán.«

\* \* \*

»O Stina, dišöva Gan, sta-pa pra mè, can ch' è da muri, che še te vëighe tè, mòr-i mò 'n tan saurí.«

\* \* \*

Šepantöne de Franzl dišöva 'n dí al Weiglaiter: »Da-me 'n fulminánt!« Y l' auter, nia pëigher, i dà 'l bostl y diš: »Tlo sit-ila a ch' lun che te ues.«

\* \* \*

Bèra Batista òva 'n dí na gran lètra da dè su. 'L òva metù su 'n bol da cin sòldi. »La lètra ie massa pesòcia, diś chëla dala pòsta, messëis mèter su mò 'n bol.« »Pu, respuent Bèra Batista, pò vëgn-ela pu mò plu pesòcia.«

\* \* \*

Stöfun ruva na dumënja böle dò-mež-dí abenëura a cësa. Per strèda ancont-el anda Stina. »Pu marítenes, ulà muess-i-pa fè debòta na crëuš, che tu vès tan abenëura a cësa? diś-ela. Y Stöfun: »Fasë-ve-la sul spinèl, anda Stina.«

\* \* \*

'L pröve, ch'òva da pistè chëi de persón, ruva 'n dí te 'n buş pra un, che ne fòva mò mèi sta iló. »Žën, diś-el, cuntë-me ma vòsta vita passèda y diśède bōl l'auritá. Ce v'à-pa menà te persón.« »N giandarm.«

\* \* \*

Un à giatà n tacuín y ne 'l à nia fa cunedí. 'N pöz dò vëgn-el tlupà su dai giandarmi y chëi uel savëi ciuldí che 'l n à nia purtà 'l tacuín a 'l fè cunedí. »'L fòva böle tan tèrt de nuet can che 'l è giapà.« »Y l' auter dí-pa?« »Pu, diś-el, l' auter dí ne fòv-el plu nia la-ite.«

\* \* \*

'N ciòc ne se 'ntopa na sëira nia a cësa. »Muessa vöster, se cont-el, ch' i m' èbe tra òra dala pòrta fauza.«

\* \* \*

'L giandarm va a se laśè trè 'n dënt; trè dënts ie 'l lëur, che na pèr de dutores fës 'l plu 'ngiért. 'L ti tira 'l fauz. »Žën èis pià 'l fauz« diś 'l giandarm. »Canta chël, respuent 'l dutór, èis-a bën 'nce Vo datrai pià 'l fauz.«

\* \* \*

Levis ie revà na sëira 'm pue' tèrt òra d'ustaria. Dan pòrta, se tir-el òra i ciauzèi y va ite bōl a chiet te standegun. Ma Levigia s' à 'mpò deśedà. Riēs pessà se ġenodl-el ġu pra cuna y mèt man de nanè y d'i ciantè dant a ch'l pitl. »Pu cie fës-a, Levis?« »'L ie bōl mōž-ëura, che pröve de 'ndurmenzè cheš Tòne, ma 'l ne uel durmì.« »Pu 'l è pu tlo te liet pra mè«, respuent Levigia.

\* \* \*

Bèra Piere à messù tlamè 'l dutór. »Pò muess-i mò ve racumandè de ne böver massa pier«, diś 'l dutór dan s'en ġi. »A no, no, respuent bèra Piere, de massa ne m'en sà-l mèi.«

\* \* \*

Mèine ie pra i saudèies. 'N dí te scòla vègn-el damandà, ciuldì ch'i saudèies d'un regimènt à butóns ghièi y i autri butóns blanč. »Aciò ch'i pòsse se ciulè 'l cuirpòt« diš-el bōl da maladèt.

\* \* \*

'N segnèur ruva 'n dí sun pastura pra la biešes. N' jède rešon-el cul dišè; pò va-l dal pàster y mèt man de ciaculè cun chël. »Vòš dišè à dit, che la biešes fošes maja adōs mò 'n tant che la blances; ie-pa chël vèira?« »Ōhō,« diš 'l paster. »Še cò ie-pa chēla?« »Pu de fošes n ie-l adōs mò n tantes che de blances.«

\* \* \*

Ch'sta cēsa ie mia y 'mpò no mia;  
Per 'l segundo n' ie-la ēnche nò da nia,  
'L tèrzo ne starà ēnche no for tlo,  
Per 'l quarto ne sarà-la ēnche no,  
'L quinto unirà ēnche purtà via.  
Die! chi pudrà di: »Ch'sta cēsa ie mia?«

(Sula cēsa Villa Runggaldier a Urtiše.)

## Pensieres.

Fos bēn drēt di vèlc datrai,  
Še 'ŋ ne falēssa for la šipa;  
Gēures la musa, diš-i: Ches bagai  
Muessa for menè la snipa.

C. D.

For pensè, ne di mèi nia  
Je melsàn per ana y còrp;  
Rusnè drēt truep y pensè nia  
Ne farà segúr degún acòrt.

C. D.

Anes supèrbes è-i je giēn:  
Sú-vier supèrbes, gū-vier da bēn,  
Laudè les muessa mi rim. —  
La-sú se cufè,  
La-gū strandlè:  
— Na crēuš d'òr pò-les avēi per mè —  
Tèl anes ne sons je bon de laudè.

C. D.

Vèl gēnt ie 'ntòrta,  
Vèlc ie mèl trata,  
Puccia d' acòrta  
Y tanta de mata.

C. D.

Na baušia ie š'che na levina:  
plu che te la berdoles, y plu grānda che la vën. C. D.

Pensè, pò dì,  
Se lecurdè, še no scri. C. D.

Maride-te o sta da maridè:  
Una y l' altra te sarà da ruè. F. M.

N' jēde òva un damandà Voltaire, 'n uem de gran inuem,  
can che 'ŋ dēssa se maridè; pò i respuend-el: »N' jēde dan i ca-  
rant' aņi no, y dò i carant' aņi gor no plu.« Fr. M.

Chi che brèva  
Se-la strèva.

\* \* \*

Chi ch' à suspõt  
Ā 'l defõt.

\* \* \*

'L draier ingiust  
Maja 'l raineš giust.

\* \* \*

'L gròs de tòrt  
'N maja dieš a bon repòrt.

\* \* \*

Gròs de stòla  
S' en gòla.

\* \* \*

'N lēur mōz fat  
Ne laš-uŋ udēi a 'n mōz mat.

\* \* \*


'N gòp y 'n zòt  
'Ngiana vintòt.

\* \* \*

L' ēiles y 'l furnöl de stua toca a cēsa.

\* \* \*

Trēnte-sics mestieres, caranta mesèries.



## Da 'n devinè.

Ah, stoma chi ch' i son:  
 Crèie, èrt nen à-i degún:  
 Mo, orös-te tò retrát  
 Avisà a tè anfát,  
 I' te-l fège zègn sul momènt,  
 Ch' èl te somèie bōl dut cant.  
 Degún moler 'l ös te n' an,  
 E ju te-l fège snōl de-bán;  
 Mo te mēsses stè pro mè,  
 Še te-l os, mai te-l da-i con tè.      Prof. Alton. \*)

## Soluzión de chël da 'ndevinè tel calènder dal añ passà:

I.		
2	7	6
9	5	1
4	3	8

II.

36.

IV.

Deguni, i autri s' en mucia.

III. J à la I. bòza da 8 litri plèina,  
 la II. bòza da 3 litri ueta,  
 la III. bòza da 5 litri ueta.

I 'n mèt: dala I. 3 l tela II. y da chëla tela III.;

rösta 5 — 3.

pò dala I. 3 l tela II. y da chëla 2 tela III.;

rösta 2 i 5;


pò dala III. 5 l tela I., dala II. 1 l tela III.

rösta tela I. 7 l II. 0 III. 1 l.

pò dala I. 3 l tela II. y da chëla tela III.;

pò n-ie-l: I. 4 l, II. 0. III. 4 l.

\*) Öra de „Rimes Ladinces“. Disprue, Wagner 1885.



## Libri nueves.

== La bibia per gherdëina. ==

(Da Segn. Tita da Pertënt.)

Plu da giut, can che 'η 'mparòva mò 'm pue' de talián a ġi a scòla, òva 'l pröve liër fè a ensegnè dala dutrina te scòla. 'L pudòva tò ca 'l catechismo talián y la bibia taliana y lašè 'nce 'm pue' lieġer dò per talián, chël che 'l òva spiegà per gherdëina. Y ġa che nòs linguagio ie parënt cul talián, univa 'nce i sculëjes prës sëura, cie ch' i ligòva. La ġiva sauri a emparè dai libri talians, chël che i òva audi per gherdëina.

Cò ie-l-pa pò al dí da 'ncuei? Dut autramënter, dut cant s' à mudà.

Te scòla ie-l òra dela sèula dutrina dut cant per tudësc. En un cont drèt bën fat. Chëi de Gherdëina à na bõla ucašión de 'mparè tela scola del luec, chël ch' i 'mparòva dant a ġi òra i Tudëš. Mutóns y mutáns pò zën passè Puntives zënza messèi se daudè de ne savèi da se cumprè la ciariefes o vèl outra ròbes. Še 'n ġeun ruva pra i saudëjes, entënd-el bõle 'l prim dí, cie che 'l cumandánt miena. Še un dë ġi òra de 'ca a se 'mparè 'n èrt, fès-el ènche plu sauri a savèi bõle da seri y rusnè tudësc. 'L ie de segúr zõche de sauri y da laudè, che 'l ie la scòles tudëšes.

Mò zõche: da 'n valgún aňi 'nca à-l scumencià a unì šaldi fulestieres ad-alèrc, adös duč tudëš. Per chiš muessa la servitù savèi rusnè tudësc. Anzi adös duta la relaziõns ons nëus cun nòs ugñs tudëš; na gran mudaziõn da cò che la fòva dant y cò 'che la ie al di da 'ncuei.

Dišerà fòrš un o l' auter: Ciuldí-pa pò na bibia per gherdëina? Tulède la tudëša, š' i 'ntënt bõl dut chiš sculëjes' o la taliana?

No una, no l' outra ne va. Cialède: La dutrina, sibe ensegnèda te scòla o te n' auter luec, ie na còssa, che muessa unì de cuer y ġi a cuer, na còssa, che muessa unì emplantèda tel cuer dela criatura, še 'η uel, che la pòrte fruč per chës mont y per l' auter. Y chësta ne pò ġi per chëi de Gherdëina autramënter che per gherdëina, a vòster ch' i rešona a cësa mè gherdëina. — No per tudësc, pervia ch' i pitli sculëjes ne 'ntënt mò nia defin 'l tudësc; no per talián, pervia che mancia la scòla taliana. — Chela trëi ġures de dutrina al' òna adròv-uη zënza, no mò che

'η muessa ensegnē talián, y a ensegnē mè a lieġer ne ġōva mò nia, šiche la sperienza mostra.

'Mbēn pō ie-l la miccia che ensegnonse dala dutrina per gherdēina, šiche dant, y che i sculējes 'mpère dala dutrina per gherdēina.

Y aciò che i sculējes pōsse 'nce lieġer dō per gherdēina; chēl che 'l prōve i à spiegà per gherdēina, ie-l necesário che sibe 'nce 'n liber: na bibia y 'n catechismo.

Per 'ntant è-i purvā a dē òra na pitla bibia per gherdēina. Plu tèrt, fōrši te n' an, še Idie me dona la vita y še la bibia vēn tēuta su bēn, unirā-l 'nce òra 'n catechismo per gherdēina.

Per pudēi pō finalmentēr ruvè al fin de dē mò òra d' autra cōsses per gherdēina, adúm cun amici o sēul, ulonse duč canč laurè pea cul

### Ladiner-Verein

de Dispruc, per abinè adúm dut chēl che ie mò de ladín y truepa cōsses, che ie bōle unides desmincēdes via. A chēsta mòda unirā-l dat òra de plu cōsses spiritucles y de 'nstruzión; 'nši pudóns cunservè nōs linguagio de Gherdēina y chēl che nes dēssa vōster 'l plu cēre y 'l plu sant, nōsta religiōn.

Davia de chēl 'l moto:

»Empèra tudēsc, no te desmincē 'l Gherdēina.«

### 'N liber, che trata dela val de Badia :

Dr. Alois Vittur, »Enneberg in Geschichte und Sage«, bei Karl Riedmann, Lana a. E. Preis geb. franko 8 K 30 h, = 7 Mk.

Ein neues Buch ist erschienen, das nicht bloß für die Enneberger, über deren Tal es handelt, sondern für alle Ladiner und Ladinerfreunde von Bedeutung ist. Darum soll die Aufmerksamkeit der Leser des vorliegenden Kalenders auch auf dieses Werk gelenkt und ihr Interesse dafür geweckt werden. Rezension soll hier keine geschrieben werden, das Buch ist ja schon vielerseits, immer in anerkennendem Sinne rezensiert worden.

Was hat das Buch entstehen lassen und was soll es uns wert und lieb machen? Die Liebe zur Heimat hat es geschrieben, Liebe zur Heimat spricht aus dem ganzen Buche und zieht jeden Leser, besonders jeden Ladiner wieder an.

Dr. Vittur, ein Kind des Gadertales, hat sich in seiner Eigenschaft als Arzt dortselbst der mühevollen Arbeit unterzogen, im Tale selbst alle erlangbaren Quellen zusammenzusuchen und zu einem Ganzen zu verarbeiten. Ja, mühevoll war die Arbeit, das Quellensuchen; denn Mangel an Verständnis und das bei allen Bergvölkern herrschende Mißtrauen haben dem Verfasser manches vorenthalten.

Und doch ist es ein stattlicher Band geworden, der bei der Lektüre gleich den Eindruck erweckt, daß der Verfasser sein Material wohl geprüft hat; und dieser Eindruck einer kritisch durchdachten Arbeit wird noch durch die im Anhang beigefügten Belege erhöht, die allein, mit einigen Bemerkungen untermischt, 128 Seiten ausmachen. Der übrige Text umfaßt 328; in 8 Kapiteln wird da behandelt: Die Profangeschichte von ihren in Dunkel gehüllten Anfängen bis zu unserer Zeit; die Kirchengeschichte: das Schulwesen; die Adels-



geschichte; dann ein Verzeichnis hervorragender Männer aus dem Gadertal und endlich ein kurzer Überblick über die bisher noch spärliche einheimische Literatur. 40 in den Text eingefügte Abbildungen gestalten das Buch lebendig und interessanter.)

Und ist das Werk inhaltlich gut, so muß auch noch der ansprechenden äußeren Ausstattung lobend gedacht werden, die dem Kommissionsverlag K. Riedmann alle Ehre macht.

Möge das Buch viele Leser finden und möge es, wie der Verfasser es wünscht, zu weiterer fruchtbringender Arbeit auf diesem Gebiete anregen. A.L.

---

<sup>1)</sup> Der Leser findet hier Seite 37 ein mit Erlaubnis des Verlages dem Werke entnommenes Bild der Katharina Lanz.



## Vian, Gröden und die Grödnertal. :: ::

Die bekannte Grammatik, welche 1864 im Verlage Wohlgemuth in Bozen erschien, wird zu kaufen gesucht und werden Angebote erbeten an

Arthur von Wallpach, Innsbruck, Innrain 14.

